

DI'IDZA' BZU SAN PABLO APOSTOL LĒ'Ē GUICHI, USE'ELA'NĒ'N LAO CIUDAD ROMA

*Baose'ela' Pablo guichi ni lao ben' nao xneza
Jesús, ben' nita' ciudad Roma*

¹ Nē'ēdi', Pablo, naca' ben' zulao xa'nro Jesucristo. Ulio Diuzi bdē'nē' nē'ēdi' apóstol quienē' ta tzetixogui'a yaca benē' di'idza' la'iya quienē'.

² Azio zē iza bē Diuzi ca unanē' huenē' con cabē' rna di'idza' la'iya quienē'. Quie lena' bēnē' mandado bzu yaca ben' naca profeta quienē' xti'idzē' lē'ē guichi.

³ Lēdi'idza' na' rguixogue'n quie xa'nro Jesucristo, zī'i Diuzi. Na'ra con cabē' gologuē' guquē' be'mbyu, cana' naquē' zī'i suba rey David.

⁴ Pero con cabē' gutiē' bebannē' tatula, lena' bzioñe'e Bichi Be quie Diuzi ra'o de que naca Jesucristo zī'i Diuzi, ben' de yela' r nabē' quie.

⁵ Nun quie Jesucristo bē Diuzi tu cule zē quiendo', use'elē' nēto' tzetixogue'ndo' xti'idzē' cuenda gata' ben' nao xneza Jesús duzē yedyi layu huejē' Jesucristo ben' zē.

⁶ Lēscan' le'e, ulio Diuzi le'e gacale ben' nao xneza Jesús.

⁷ Lena' use'ela' guichi ni lao le'e ben' nita' ciudad Roma nun quie nedyē'ē Diuzi le'e, ulionē'

le'e gacale ben' la'iya quienë'. Rulidza' Xuzi-ro
 Diuzi len xa'nro Jesucristo ta huela'iyajë' le'e,
 cuëchijë' chizi lu'u guichi laxta'ole.

Gu'un Pablo tzioguë' ciudad Roma

⁸ Tanëro re'enda' inia' le'e de que lao Jesucristo
 rulidza' Diuzi yëpa'në' diuxcalelo' por lao le'e,
 como dan' yugulu ben' nita' lao yedyi layu
 arnäyaquë' ca tadya'a ruele, rue quiele quie
 Diuzi.

⁹ Du guicho du la'adya' rua' ca mandado rue
 Diuzi në'ëdi', rguixogui'a yaca benë' cabë' naca
 quie zï'inë'. Naca Diuzi testigo de que yugu dza
 reza'la'adya' le'e rulidza' Diuzi ta gacalënë' le'e.

¹⁰ Yugu dzacazi rulidza' Diuzi chi rapë' gusto
 ta guida' ideyuba' le'e.

¹¹ Cana' re'enda' idena'a le'e ta idesëdira' le'e ta
 tzioñe'ele mazara ca naca pensari quie Diuzi
 cuenda huera quiele xti'idza' Diuzi.

¹² Cana' re'enda' cuenda uxela'adya' le'e, hue
 quiele xti'idza' Diuzi, lëscan' cuenda uxela'adyi'le
 në'ëdi', hue quia' xti'idza' Diuzi ca naca quiero
 rzudyi'ilëro Diuzi.

¹³ Bicha', re'enda' inezile lega raca' pensari
 guida' ideyuba' le'e pero birzaque'da'. Re'enda'
 guida' ta gacalia' le'e inaorale mazara xneza
 Diuzi cabë' bia' gucalia' yaca ben' tula, ben' nita'
 yedyi tula.

¹⁴ Lega de compromiso quia' quixogui'a
 yugulu benë' xti'idza' Diuzi, la'acazi ben' nita' lao
 ciudad zë, la'acazi ben' nita' lao yedyi dao',
 la'acazi ben' rioñe'e, la'acazi ben' birioñe'e.

¹⁵ Por tu parte quia', zucaza' dispuesto guida' laole ciudad Roma idetixogui'a le'e di'idza' la'iya quie Diuzi.

Napan fuerza valor xti'idza' Diuzi

¹⁶ Biredue'da' quixogui'a ja benë' di'idza' la'iya quie Diuzi, como dan' napan fuerza valor quienë' ta ute uselanë' nutezi ben' hue quie xti'idzë' gata' yela' neban quienë' tuzioli. Tabelaora na' te ila yaca ben' Israel, pero lëscan' nacan belao te ila yaca ben' tula, ben' binaca ben' Israel.

¹⁷ Rguixogue' di'idza' la'iya quie Diuzi ra'o cabë' re'ennë' sudyi'ilëro lëbë' ta ilë'ënë' ra'o ben' laxta'o yëri. Tuzi ta huero sudyi'ilëro lëbë', cana' ilë'ënë' ra'o ben' laxta'o yëri. Lena' rguixogue'n lë'ë guichi la'iya quie Diuzi cani: "Nu ben' ilë'ë Diuzi ben' laxta'o yëri, hue' Diuzi lëbë' yela' neban tuzioli nun quie dan' rzudyi'ilënë' lëbë'."

Napa yugulu benë' dula' xquia

¹⁸ Na' zu Diuzi guibá huenë' castigo quie yugulu ben' mala, ben' rue ta biraxenë'. Yela' ben' mala quiejë' biruejë' lato tzu'ujë' pensari quie Diuzi ta inezijë' ta naca tali quie Diuzi.

¹⁹ Dyë'ëdi nezijë' zu Diuzi guibá, como dan' cuin Diuzi blu'enë' leyaquë' zunë' guibá rlë'ëyaquë' ta bzalonë' ulëchinë' lao yedyi layu.

²⁰ Rulu'ecazin zu Diuzi guibá la'acazi bisaque' ilë'ëroguë', porque huazaque' ilë'ëro ta ulëchinë' lao yedyi layu. Desde dza bzalo Diuzi yedyi layu, bablu'en zucazi Diuzi guibá, de yela' rnabë' quienë' tuzioli. Quie lena' bisaque' ina yaca benë' binezijë' chi zu Diuzi guibá.

21 Ba'ala'cazi nezijë' zu Diuzi guibá,
birapala'një' lëbë', nica rëbijë' lëbë' diuxcalelo',
pero yu'uyaquë' pensari mala, pensari
bibizaca'n. Naca laxta'ojë' laxta'o yaladyi',
rdayaquë' lao lato lao chula.

22 Ba'ala'cazi najë' nacajë' ben' rioñe'e, dechan'
birioñe'ejë'.

23 Lao laza rionla'adyi'jë' Diuzi, ben' zu tuzioli,
rionla'adyi'jë' yaga ta pcha'a yaca benë', bëjë'
forma quie benë' ta bizu tuzioli. Hasta
rionla'adyi'jë' yaga pcha'a yaca benë', bëjë' forma
quie nu bguini, nu bëla, nu bia zu tapa ni'e.

24 Quie lena' apsanla'adyi' Diuzi lejë' ta ruejë'
tamala ca raxejë'. Quie lena' ruelëjë' laguedyijë'
ta naca stu' sla'na.

25 Cana' raca quiejë', como dan' birue
quieyaquë' xti'idza' Diuzi. Quie lena'
apsanla'adyi' Diuzi lëjë' ta hue quieyaquë' ta
binaca tali. Cala Diuzi rionla'adyi'jë'. Lao laza
Diuzi, rionla'adyi'jë' ta bzalo Diuzi ulëchinë' lao
yedyi layu. Birionla'adyi'jë' tuzi Diuzi, ben'
reya'ala' tzionla'adyi'jë' tuzioli. Amén.

26 Quie lena' apsanla'adyi' Diuzi leyaquë' ta
rueyaquë' ta naca stu' sla'na quiejë'. Hasta
nigula quiejë' bira re'enjë' gasilëjë' be'mbyu
quiejë'. Bare'enjë' gasilëjë' laguedyi nigulajë' ta
huelëjë' laguedyi nigulajë' ta naca stu' sla'na.

27 Lëscan' ca raca quie yaca nigula quiejë',
cana' racarë quie yaca be'mbyu. Bira re'enjë'
gasilëjë' nigula quiejë'. Barza'la'adyi'jë' gasilëjë'
laguedyi byujë' ta huelëjë' laguedyi byujë' ta
naca stu' sla'na. Tanun quie ruejë' cana', racajë'
castigo rbiagui'neza cuerpo quiejë'.

28 Como bire'enyacuë' huebë'yaquë' Diuzi, lena' apsanla'adyi' Diuzi leyaquë' ta yu'uyaquë' pensari bayatza rueyaquë' ta naca stu' sla'na.

29 Lega raxejë' huejë' tabayatza. Rutila rudzagajë' con nutezi nigula, rguilojë' ga huejë' tamala, rzala'adyi'jë' dumi, re'enjë' gaca tamala quie laguedyijë', racazë'jë', rutijë' benë', rguilojë' dila, rzi'jë' yë', rlë'ëjë' laguedyijë' ben' mala, ru'eyaquë' di'idza' bizū.

30 Rnëjë' contra nutezi benë', barnaya'jë' Diuzi, birapajë' respeto yaca benë', ruejë' cuinjë' ben' zë, rguilojë' ruejë' tamala, biralejë' quie xuzi zña'jë'.

31 Birioñe'ejë' biruzujë' di'idza', binedyë'ëjë' familia quiejë', birzi'zëjë' quie benë', bireyëchi'la'adyi'jë' benë'.

32 Ba'ala'cazi nezijë' cabë' nachuguli Diuzi quiejë' huejë' castigo quiejë' tziojë' lao gui' gabila, nenaøjë' neruejë' pensari mala quiejë', redaohuejë' re'enjë' hue yaca ben' tula cabë' ruejë'.

2

Puro ta naca tali ina Diuzi

1 Quie lena' bide bihuele ta huele defender cuinle lao Diuzi, nuti'tezi nacale, chi rnale rue laguedyile tamala, na' le'e tu lëbizi ziole ruele cabë' tamala rnale rue laguedyile. Conlë di'idza' rero lu'u ru'ale rulu'en lëscan' le'e nacale ben' mala.

2 Neziro ta naca tali rchuguli Diuzi huenë' castigo nu ben' rue tamala.

³ Le'e rnale rue laguedyile tamala, na' lëbizi ziole ruele tamala, ¿raquele bihue Diuzi le'e castigo?

⁴ ¿Quele aoquixile binezile ga huen dyin yela' ben' huen quie Diuzi? ¿Quele binezile rue Diuzi tahuen quiele rbezë' yetza'le pensari quiele inaole xnezë'?

⁵ Pero ben' yaladyi' nacale, bire'enle yetza'le pensari quiele. Quie lena' huata' castigo huala quiele dza hue Diuzi juicio. Huachugulinë' ta tzu'u ni'a xnezi quiele.

⁶ Huaguizünë' quie quiero según ca bëro.

⁷ Hue'në' yela' neban tuzioli yaca ben' biyeyati hue tahuen yugu dza, yaca ben' re'en gata' yela' bala'ana quiejë' lao Diuzi, yaca ben' rbeza gata' quieyaquë' ta biyeyudyi yedu.

⁸ Pero huadza' Diuzi huenë' castigo yaca ben' bire'en uzu di'idza' quienë', yaca ben' bire'en inao neza li quienë', yaca ben' re'en inao neza mala.

⁹ Yugulu ben' rue tamala yedzagalaoyaquë', huata' tazëdi gula quieyaquë'. Chi ben' Israel yedzagalaorayaquë', pero chi ben' tula, lëscan' yedzagalaoyaquë'.

¹⁰ Pero yugulu ben' rue tahuen, hue Diuzi leyaquë' ben' zë, cuëchinë' chizi laxta'oyaquë'. Chi ben' Israel hueranë' leyaquë' ben' zëra, pero chi ben' tula, lëscan' huenë' leyaquë' ben' zë.

¹¹ Cana' hue Diuzi, porque birue Diuzi natza'la quie yaca benë', tuzcazi ca ruenë'.

¹² Pues yugulu ben' rue xquia, pero binezijë' con cabë' rna lë'ë guichi ley na' pca'n Diuzi lao na'a Moisés, huachuguli Diuzi lëjë', pero bihue

Diuzi cuenda con cabè' rna lè'è guichi ley na'. Lèscan' yaca ben' rue xquia nezijè' con cabè' rna lè'è guichi ley na', huachuguli Diuzi lèjè' huenè' cuenda con cabè' rna lè'è guichi ley na'.

¹³ Birlè'è Diuzi ben' laxta'o yèri ben' ruzènagazi con cabè' rna lè'è guichi ley na', na' biruzunè' di'idza' con cabè' rnan. Rlè'è Diuzi ben' laxta'o yèri ben' ruzènaga con cabè' rna lè'è guichi ley na', na' ruzunè' di'idza' con cabè' nan.

¹⁴ Na'ra quie ja ben' binaca ben' Israel, cati ruzujè' di'idza' con cabè' rnan lao guichi ley na', la'acazi binezijè' chi de guichi ley pca'n Diuzi lao na'a Moisés, lena' rulu'en naca pensari quiejè' conforme con cabè' rnan lè'è guichi ley na'.

¹⁵ Pues nun quie naojè' neza dya'a, lena' rulu'en yu'ujè' pensari con cabè' rnan lè'è guichi ley quie Diuzi. Ca naca pensari yu'ujè', lena' rulu'en quiejè' nezcazijè' ca re'en Diuzi huejè'. Cuincazi pensari quiejè' yu'ujè' rchugulina quiejè' chi ruejè' tahuen, chi ruejè' tamala.

¹⁶ Dza hue Diuzi juicio huachugulinè' con cabè' bè yaca ben' raque nagachi'zi bèjè' bin' bèjè'. Lao na'a Diuzi huachuguli Jesucristo yaca benè' conforme con cabè' rna di'idza' la'iya quienè'. Lèdi'idza' na' rguixogui'a yaca benè'.

Ni rnan quie ben' Israel len guichi ley pca'n Diuzi lao na'a Moisés

¹⁷ Pero le'e rnale nacale ben' Israel. Raquele huezi' Diuzi le'e nun quie naole guichi ley pca'n Diuzi lao na'a Moisés. Ruele dzalo inale nacale ben' quie Diuzi.

18 Nezile ca re'en Diuzi hue yaca benë'. Lëscan' rsëdile con cabë' rna lë'ë guichi ley quie Diuzi ta inezile bi huele huele tadya'a.

19 Raquele rioñe'ele, bidzebile uzioñe'ele ben' birioñe'e. Raquele dyin quiele uzioñe'ele ben' rda lao lato lao chula.

20 Raquele inezile usëdile yaca ben' birioñe'e. Raquele inezile ulu'ele yaca ben' binenezi con cabë' rna lë'ë guichi ley pca'n Diuzi lao na'a Moisés ga rguixogue'n quie yela' rioñe'e len yela' li quie Diuzi.

21 Chi le'e rusëdile ben' tula, ¿bixquien' birusëdile cuinle? Chi le'e yëbile benë' bireya'ala' cuanle quie benë', ¿bixquien' rbanle quie benë'?

22 Chi le'e yëbile benë' bireya'ala' utilale nigula tula, ¿bixquien' rutilale nigula tula? Chi le'e ratzale ilë'ële yaca ídolo, ¿bixquien' ru'ule lu'u idao' ga rdyia yaca ídolo rbanle ta zaca' ta yu'u dumi quieyacan?

23 Ruele dzalo inale tadya'a naca guichi ley pca'n Diuzi lao na'a Moisés, pero rutitule Diuzi biruzule di'idza' cabë' di'idza' rnën lë'ë guichi ley na'.

24 Quie lena' rna lë'ë guichi ley na' cani: “Yaca ben' binaca ben' Israel, rnëbižoyaquë' quie Diuzi, pero dula' quiele rnajë' cana'.”

25 Talicazi de ga huen dyin uzule tu xëdyidao' cuinle ca mandado bë Diuzi dza na', pero solamente chi hue quiele quie guichi ley pca'n Diuzi lao na'a Moisés. Porque chi bihue quiele quie guichi ley na', na' naca quiele ca quie ben' bizu xëdyidao' cuine.

26 Na' chi ruzu ben' bizu xëdyidao' cuine di'idza'

quie guichi ley pca'n Diuzi lao na'a Moisés, na' hualë'ë Diuzi lëjë' ca quie ben' zu xëdyidao' cuine.

²⁷ Pues yaca ben' bizu xëdyidao' cuine, pero ruzuyaquë' di'idza' con cabë' rna lë'ë guichi ley pca'n Diuzi lao na'a Moisés, lëjë' huachugulijë' quiele le'e, ben' biruzu di'idza' con cabë' rnan, la'acazi napale le'e guichi quie ley, la'acazi zu xëdyidao' cuinle.

²⁸ Binaca dugalo ben' Israel yaca ben' bë'ruezi con cabë' rna Diuzi. Lëscan' binaca dugalo ben' Israel yaca ben' zu xëdyidao' cuine, pero birue quienë' xti'idza' Diuzi.

²⁹ Na' naca dugalo ben' Israel ben' rue quie du guicho du la'adyi' ca na Diuzi. Lëscan' cati hue quiero du guicho du la'adyi'ro con cabë' rna Diuzi, lena' rulu'en dugalo nacaro ben' zu xëdyidao' cuinro. Nu ben' rue quie con cabë' rna Diuzi, rlë'ë Diuzi lëbë' ben' laxta'o yëri.

3

¹ ¿Ca bizī nacara tahuen quie ben' Israel ca ben' binaca ben' Israel? ¿Gaži huen dyin chi zu ben' Israel tu xëdyidao' cuinjë'?

² Tazë nacara huen quiejë', tazë rson de nacara tahuen quiejë'. Pues pca'n Diuzi di'idza' quienë' lao na'ayaquë'.

³ Tali na' bigule bala ja ben' Israel con cabë' gu'un Diuzi huejë' dza na', pero quie lena', ¿bi pensari huero? ¿Huero pensari lëscan' bihue Diuzi cabë' unanë' huenë'?

⁴ ¡Bireya'ala' huero pensari cana! Seguro na' hue Diuzi cabë' unanë' huenë' conforme cabë' naca tali, la'acazi chi ben' huizi' yë' yugulu ben'

nita' lao yedyi layu. Lena' rguixogue'n lë'ë guichi la'ia quie Diuzi cani:

Tanun quie di'idza' rero lu'u ru'a Diuzi, banezi ja benë' naca Diuzi ben' rue tali.

Cati ilë'ëyaquë' ca rue Diuzi, na' inajë': "Diuzi naquë' ben' laxta'o yëri."

⁵ Pero chi nacan tali de que por nun quie yela' ben' mala quiero, lena' rulu'en naca Diuzi ben' huen, ¿ca bi pensari reya'ala' huero? ¿Huero pensari naca Diuzi ben' mala chi huenë' castigo nu ben' mala? (Pensari quie benë' rnia', cala pensari quie Diuzi.)

⁶ Bireya'ala' huero pensari naca Diuzi ben' mala. Chi naca Diuzi ben' mala, bide derecho quienë' ichugulinë' ben' nita' lao yedyi layu, inanë' nu ben' bë tahuen, nu ben' bë tamala.

⁷ Lëscan' chi nacan tali de que por nun quie yela' huizi' yë' quiero, lena' rulu'en naca xti'idza' Diuzi di'idza' li, ¿bixquien' hue Diuzi castigo nu ben' huizi' yë'?

⁸ Chi tali nacan cana', ¿cala tahuen na' huero tamala tacuenda gata' tadya'a? Cana' na bala ja benë', rnajë' cana' inando' rguixogue'ndo' benë'. Pero pensari mala yu'ujë', como dan' cala cana' inando' rguixogue'ndo' benë'. Dula' quiezijë' hue Diuzi lëjë' castigo.

Napa yugulu benë' dula' xquia

⁹ ¿Ca bi pensari reya'ala' huero? ¿Huero pensari naca ben' Israel ben' dya'ara ca ben' tula, ben' binaca ben' Israel? ¡Bisague'! Bireya'ala' huero pensari cana', como dan' napa yugulu benë' dula' xquia, la'acazi ben' Israel,

la'acazi ben' binaca ben' Israel. Yugulujë' rnao dula' xquia quiejë' lëjë'.

¹⁰ Cana' rguixogue'n lë'ë guichi la'iya quie Diuzi cani:
Ganu ben' laxta'o yëri zu, ni tuyaquë'.

¹¹ Bizu ben' rioñe'e.
Bizu ben' nuebë' Diuzi.

¹² Yuguluyaquë' rdayaquë' lao lato lao chula.
Rnaoyaquë' neza mala ga cuiagui'yaquë'.
Bizu ben' rue tahuen, ni tuyaquë'.

¹³ Ca tu yerobá neyalon ga rla' zigo, cana' naca di'idza' rero lu'u ru'ayaquë'.
Ta rzi'jë' yë' ru'elëjë' benë' di'idza'.
Ca veneno quie bëla naca di'idza' rero lu'u ru'ayaquë'.

¹⁴ Rudze'de'yaquë' laguediyiyaquë', rnëjë' di'idza' zi'.

¹⁵ Tariara rdayaquë' rbe'nidiyiaquë' benë' ta gutiyaquë' leyaquë'.

¹⁶ Con ga zioyaquë' rudyiagui'yaquë' benë', ruca'nyëchi'yaquë' laguediyiyaquë'.

¹⁷ Binezियाquë' tzu'ulëyaquë' laguediyiyaquë' dyë'ëdi.

¹⁸ Ni siquiera ruejë' pensari chi hue Diuzi lëjë' castigo.

¹⁹ Cana' rnën lë'ë guichi la'iya quie Diuzi. Na'ra ra'o neziro con cabë' rna lë'ë guichi ley pca'n Diuzi lao na'a Moisés dza na'te. Neziro rnabë'n lao ja ben' nao len cuenda biibin yaca benë' bi yequëbiyaquë' lao Diuzi dza gaca juicio, dza rue yugulu benë' cuenda lao Diuzi.

²⁰ Pero quele por nun quie dan' rue quiero con cabë' rna lë'ë guichi ley pca'n Diuzi lao Moisés

ilë'ë Diuzi ra'o ben' laxta'o yëri. Conforme con cabë' rna lë'ë guichi ley na' neziro de dula' xquia quiero.

Ilë'ë Diuzi ra'o ben' laxta'o yëri tanun quie dan' rzudyi'ilëro Cristo

²¹ Pero na'a barioñe'ero cabë' nacan ilë'ë Diuzi ra'o ben' laxta'o yëri. Cala por nun quie chi hue quiero con cabë' rna lë'ë guichi ley pca'nnë' lao na'a Moisés ilë'ënë' ra'o ben' laxta'o yëri. Lena' rguixogue'n lë'ë guichi ley na' lente ja guichi bë ja ben' udixogue' di'idza' quie Diuzi dza na'te.

²² Tanun quie dan' rzudyi'ilëro Jesucristo, cana' ilë'ë Diuzi ra'o ben' laxta'o yëri. Ilë'ë Diuzi ben' laxta'o yëri yugulu ben' rzudyi'ilë lëbë'. Tuz ca ilë'ënë' ben' rzudyi'ilë Jesucristo, ilë'ënë' ra'o ben' laxta'o yëri, la'acazi ben' Israel, la'acazi ben' binaca ben' Israel.

²³ Yuguluro de dula' xquia quiero. Yuguluro biuzuero huero yugulu ca re'en Diuzi huero.

²⁴ Pero naca Diuzi ben' huen ilë'ënë' ra'o ben' laxta'o yëri. Bibiquizüroguë' ilë'ënë' ra'o ben' laxta'o yëri como dan' Cristo Jesús gutinë' udizüguë' quie dula' xquia quiero, cana' ru'en lato ilë'ë Diuzi ra'o ben' laxta'o yëri.

²⁵ Use'ela' Diuzi Cristo lao yedyi layu ta gutië' lë'ë yaga cruzo ta gata' yela' huenitilao quiero lao Diuzi. Tanun quie lena' huezi'zë Diuzi quie dula' xquia quie nu ben' sudyi'ilë Cristo. Cana' bë Diuzi lao na'a Cristo ta tzioñe'ero naca Diuzi ben' rue ta yu'u ni'a xnezi. Pues talicazi cabë' bë Diuzi, ulezë' bibënë' castigo quie yaca ben' bë xquia tu bineguida Cristo.

²⁶ Lëscan' bë Diuzi cana' ta tzioñe'ero biusan Diuzi huenë' ta yu'u ni'a xnezi dza quiero, dza rdaro lao yedyi layu. Pues ta yu'u ni'a xnezi neruenë', rlë'ënë' yaca ben' rzudyi'ilë Jesús ben' laxta'o yëri.

²⁷ Bireya'ala' huero cuinro ben' zë tanun quie dan' rlë'ë Diuzi ra'o ben' laxta'o yëri. ¿Bixquien' bireya'ala' huero cuinro ben' zë? Bireya'ala' como dan' cule quie Diuzi na' rlë'ënë' ra'o ben' laxta'o yëri, quele yela' ben' huen quiero. Rlë'ë Diuzi ra'o ben' laxta'o yëri por nun quie rzudyi'ilëro Cristo, cala por nun quie chi ruero ca mandado rue lao ley quienë' pca'nnë' lao na'a Moisés.

²⁸ Quie lena' rioñe'ero rlë'ë Diuzi ra'o ben' laxta'o yëri chi rzudyi'ilëro Cristo, cala por nun quie chi bëro, chi bibëro ca mandado rue lao ley quienë'.

²⁹ ¿Biži ca inale? ¿Inale tu cue'zi yaca ben' Israel r nabë' Diuzi? ¿Binezile r nabë'rë Diuzi lao yaca ben' binaca ben' Israel? Claro na' r nabë'cazi Diuzi lao yugulu benë'.

³⁰ Calazë diuzi zu, tuzi Diuzi zu. Tanun quie chi rzudyi'ilëro Cristo ilë'ë Diuzi ra'o ben' laxta'o yëri, la'acazi nacaro ben' Israel, la'acazi binacaro ben' Israel.

³¹ Na'ra ¿ca bi pensari huero? ¿Huero pensari bibi zaca' ley na', como dan' rzudyi'ilëro Cristo na'a? Bireya'ala' huero pensari cana', dechan' reya'ala' huero pensari decazi ga huen dyin ley na' ta pca'n Diuzi lao na'a Moisés.

Ni nan cabë' di'idza' bega'nlä Diuzi Abraham

¹ ¿Ca bi pensari reya'ala' huero quie xuzixta'oro Abraham?

² Chi tanun quie yela' ben' huen quienë', blë'ë Diuzi lëbë' ben' laxta'o yëri, na'ra napa Abraham derecho huenë' cuinnë' ben' zë lao Diuzi.

³ ¿Ca bizī rnan lë'ë guichi la'iya quie Diuzi? Pues rnan cani: “Bzudyi'ilë Abraham Diuzi. Con lëzin blë'ë Diuzi lëbë' ben' laxta'o yëri.”

⁴ Chi huero tu dyin, binacan cule quie xa'nro quizūguë' ra'o. Pues ta reya'ala' quizūguë' ra'o.

⁵ Pero chi rzudyi'ilëro Cristo, chi por lëzin hualë'ë Diuzi ra'o ben' laxta'o yëri, lena' nacan cule bë Diuzi quiero, cala ta reya'ala' huenë' quiero.

⁶ Cana' una rey David dza na'te. Unë' cabë' redaohue benë' rlë'ë Diuzi lëbë' ben' laxta'o yëri tanun quie rzudyi'ilënë' Diuzi. Redaohue ben' babeguba Diuzi dula' xquia quie, ben' bihue Diuzi cuenda cabë' tamala bënë'.

⁷ Lena' rguixogue'n lë'ë guichi la'iya quie Diuzi cani:

Redaohue yaca benë' bezi'zë Diuzi dula' xquia quie.

Redaohuejë' chi bihue Diuzi lëjë' castigo quie tamala quiejë'.

⁸ Redaohue nu ben' bihue Diuzi cuenda quie dula' xquia quie, ben' rzudyi'ilë Diuzi.

Cana' rnën lë'ë guichi la'iya quie Diuzi.

⁹ Na'ra rnaba' le'e: ¿Ca bi pensari ruele? ¿Ruele pensari huezi'zë Diuzi dula' xquia quie tu cue'zi yaca ben' Israel, ben' zu xëdyidao' cuine?

¿Binezile huezi'zërë Diuzi dula' xquia quie yaca

ben' tula, yaca ben' bizu xëdyidao' cuine: Neziro dyë'ëdi blë'ë Diuzi Abraham ben' laxta'o yëri tanun quie dan' bzudyi'ilënë' Diuzi.

¹⁰ ¿Bata blë'ë Diuzi Abraham ben' laxta'o yëri? ¿Blë'ënë' lëbë' ben' laxta'o yëri tu binesu xëdyidao' cuine, o cati babzu xëdyidao' cuine? Pues tu binesu xëdyidao' cuine blë'ë Diuzi lëbë' ben' laxta'o yëri.

¹¹ Pero tanëro bzudyi'ilë Abraham Diuzi, na'tera blë'ë Diuzi lëbë' ben' laxta'o yëri. Beyudyi blë'ë Diuzi lëbë' ben' laxta'o yëri, na'ra bzujë' tu xëdyidao' cuinnë' como seña de que rlë'ë Diuzi lëbë' ben' laxta'o yëri tanun quie dan' rzudyi'ilënë' Diuzi. Quie lena' naca Abraham xuzixta'o yugulu ben' laxta'o yëri, ben' rzudyi'ilë Diuzi, ben' bizu xëdyidao' cuine.

¹² Lëscan' quie lena' nacarë Abraham xuzixta'o yaca ben' zu xëdyidao' cuine, ben' rzudyi'ilë Diuzi cabë' bzudyi'ilë Abraham Diuzi dza na'te caora binesu xëdyidao' cuinnë'.

Tanun quie rzudyi'ilëro Diuzi, cana' uzunë' di'idza' ca unë' huenë' quiero gacalënë' ra'o

¹³ Bega'n'lë Diuzi Abraham len z'isubanë' di'idza' ta yega'n quiejë' duzë yedyi layu dza zaza'ra. Pero bega'n'lë Diuzi Abraham di'idza' tanun quie bzudyi'ilënë' Diuzi. Lena' blë'ë Diuzi Abraham ben' laxta'o yëri, cala tanun quie guichi ley pca'n Diuzi lao na'a Moisés.

¹⁴ Chi nacan tali yega'n duzë yedyi layu para tu cue'zi ben' rue quie ca mandado rue lao guichi ley pca'n Diuzi lao na'a Moisés, na'ra bisaque'

inaro zaca' sudyi'ilëro Diuzi, bisaque' inaro zaca' di'idza' cabë' di'idza' began'nlë Diuzi Abraham.

15 Pero binacan tali cana', como dan' nusa' ley na' castigo quie yaca ben' birue quieyaquë' con cabë' rnan. Pero bigata' falta quie nu ben' binezi con cabë' rnan, na'ra birue quieyaquë'n.

16 Tanun quie bzudyi'ilë Abraham Diuzi, cana' udapa Diuzi compromiso uca'nnë' duzë yedyi layu lao na'a Abraham. Cala ta quizũ Abraham Diuzi uca'n Diuzi duzë yedyi layu lao na'anë'. Pero bë Diuzi cana' tacuenda xela'adyi' yugulu z'i'suba Abraham de que gacacazi con cabë' una Diuzi huenë'. Cani nacan. Cala tuzi ben' nao ca mandado rue lao guichi ley udapa Diuzi compromiso, pero lëscan' udapa Diuzi compromiso con nu ben' rzudyi'ilë Diuzi cabë' bzudyi'ilë Abraham Diuzi. Cana' pca'n Diuzi naca Abraham xuzi yugulu ben' rzudyi'ilë Diuzi.

17 Bagulecazi Abraham con cabë' rguixogue'n lë'ë guichi la'iya quie Diuzi ga una Diuzi cani: "Bapca'na' luë' xuzi yugulu ben' za' yedyi zitu', yugulu ben' rzudyi'ilë në'ëdi'." Cana' rnan lë'ë guichi. Naca Diuzi ben' useban ben' huati. Naca Diuzi ben' bzalo yugulu ta bide dza na'te.

18 La'acazi guque Abraham bigaca quienë' cabë' una Diuzi huenë' quienë', bipsannë' uzudyi'ilënë' Diuzi, ulezë' hue Diuzi quienë' cabë' unë' huenë' quienë'. Cana' guca quie Abraham naquë' "xuzi yugulu ben' za' yedyi zitu', yugulu ben' rzudyi'ilë Diuzi", conforme con ca gudyi Diuzi lëbë' dza na'te: "Gaca tazë z'i'subo'."

19 La'acazi napa Abraham cadu tu gayuhua iza, bipsannë' rbezë' gaca quië' cabë' compromiso

udapalë Diuzi lëbë'. Bipsannë' rbezë' la'acazi banaquë' ben' gula, la'acazi banacarë zğulë' ben' gula. Baode tiempo quie nigula quienë' bibi'anë' xcuidi'. Baidyin hora gatiyaquë'.

²⁰ Bibënë' pensari mala, bipsannë' rbezë' gaca quienë' cabë' compromiso udapalë Diuzi lëbë'. Cana' bënë' uzudyi'ilënë' Diuzi udapë' lëbë' bala'ana.

²¹ Dyë'ëdi unezi Abraham napa Diuzi fuerza valor ta uzuë' di'idza' cabë' compromiso rapalënë' benë'.

²² Quie lena' blë'ë Diuzi Abraham ben' laxta'o yëri.

²³ Na'ra dza na'te bë Diuzi mandado bzu yaca benë' di'idza' quienë' lë'ë guichi ta rguixogue'n cabë' guca quie Abraham, bzudyi'ilënë' Diuzi blë'ë Diuzi lëbë' ben' laxta'o yëri. Pero cala para tuzi lëbë' bë Diuzi mandado bzujë' di'idza' quienë' lë'ë guichi.

²⁴ Lëscan' bë Diuzi mandado bzujë' di'idza' quienë' lë'ë guichi ta ineziro ra'o hualë'ë Diuzi ra'o ben' laxta'o yëri, chi rzudyi'ilëro lëbë', ben' pseban Jesús, ben' naca za'nro.

²⁵ Tanun quie guti Jesús lë'ë yaga cruzo bebannë', ru'en lato yezi'zë Diuzi dula' xquia quiero. Lëscan' tanun quie bebannë' ru'en lato ilë'ë Diuzi ra'o ben' laxta'o yëri.

5

Tahuen naca quiero ilë'ë Diuzi ra'o ben' laxta'o yëri

¹ Na'ra como dan' rlë'ë Diuzi ra'o ben' laxta'o yëri por nun quie rzudyi'ilëro xa'nro Jesucristo, quie lena' rbe' chizi laxta'oro lao Diuzi.

² Naca Cristo ben' sëlë ra'o lao Diuzi por nun quie dan' rzudyi'ilëro lëbë'. Quie lena' huela'iya Diuzi ra'o inaoro xnezë' du guicho du la'adyi'ro. Quie lena' redaohuero rbezaro yeyoro ga zu Diuzi guibá.

³ Lëscana' redaohuero cati raca zëdi quiero yedzagalaoro, porque neziro chi yedzagalaoro, cana' huacalë Diuzi ra'o ta suero inaoro xnezë' dyë'ëdi.

⁴ Lëscan' chi suero inaoro xnezë' dyë'ëdi, cana' yedaohue Diuzi ca ruero. Lëscan' chi yedaohue Diuzi ca ruero, cana' rbezaro dyë'ëdi yeyoro guibá ga zuë'.

⁵ Zuro contento biyehuëdiro rbezaro yeyoro guibá ga zu Diuzi como dan' use'ela' Diuzi Bichi Be quienë', bagucalënë' ra'o ta idyë'ëro Diuzi, bayu'uro yela' nedyë'ë quie Diuzi lu'u guicho laxta'oro.

⁶ Caora cati bibi de huero ta ute uselaro cuinro lao Diuzi, na'ra bida Cristo gutinë' lë'ë yaga cruzo. Ca bdyin hora gu'un Diuzi gaca, caora na' guti Cristo ta gazõ dula' xquia quie ja ben' binuebë' Diuzi.

⁷ Nunu re'en gati lao laza ben' tula. Derepente ga zu benë' gue'ennë' gatië' lao laza ben' tula, ben' huen gula.

⁸ Pero bablë'ëro cabë' bë Diuzi nedyë'ënë' ra'o use'elë' zĩ'inë' gutië' lë'ë yaga cruzo cuenda gazõ dula' xquia quiero caora cati nenacaro ben' de dula' xquia quie.

⁹ Na'ra barlë'ë Diuzi ra'o ben' laxta'o yëri tanun quie dan' guti Cristo lë'ë yaga cruzo. Lëscan' por nun quie lëbë' bihue Diuzi ra'o castigo dza gaca

juicio lao yedyi layu.

¹⁰ Caora cati nenacaro enemigo quie Diuzi, na'ra ulëchitza'o cuin Diuzi ra'o len lëbë' cuenda tzu'ulëronë' tuzë. Cana' bë Diuzi tanun quie dan' guti zĩ'inë' lë'ë yaga cruzo. Quie lena' seguro nacan yezi' Diuzi ra'o por nun quie dan' guti beban zĩ'inë', banacalëronë' tuzë.

¹¹ Cala tuzi ulëchitza'o Diuzi ra'o, pero lëscan' rna' ruhuanë' ra'o por nun quie zĩ'inë' Jesucristo. Pues lao na'a Jesucristo nacalëro Diuzi tuzë rbe' chizi laxta'oro.

Ni rguixogue'n cabë'bë Adán len cabë' bë Cristo

¹² Tanun quie tuzi be'mbyu guta' dula' xquia lao yedyi layu. Na'ra como dan' guta' dula' xquia lao yedyi layu, cana' guta'rë yela' guti quie yugulu benë', como dan' yugulu benë' napajë' dula' xquia.

¹³ Desde dza na'te, dza bineca'n Diuzi ley quienë' lao na'a Moisés, baquezi napa yaca ben' nita' lao yedyi layu dula' xquia. Però uleza Diuzi bibë Diuzi leyaquë' castigo dza na'te como dan' binuca'nnë' ley quienë'.

¹⁴ Guticazi yaca ben' unita' dza uda Adán lao yedyi layu hasta ben' unita' dza uda Moisés lao yedyi layu. Caora bdyin dza quieyaquë' gutiyaquë' como dan' napajë' dula' xquia. Guticaziyaquë' la' acazi netza' tamala bëyaquë' cala ca tamala bë Adán. Bibzu Adán di'idza' ca mandado bë Diuzi lëbë'.

¹⁵ Netza' ca naca ta udilo' Adán. Netza' ca naca tadya'a rue Diuzi quiero ra'o. Tanun quie ta udilo' tuzi be'mbyu Adán guta' yela' guti quie ja ben' nita' lao yedyi layu. Però netza' cabë' bë

Diuzi, bënë' quiero tu cule zẽ. Bënë' tahuen gula quie yaca ben' nita' lao yedyi layu. Gun Diuzi ra'o yela' neban tuzioli por nun quie yela' bzu di'idza' quie tuzi be'mbyu Jesucristo. Biuquizũnë' ra'o quie yela' naban gunnë' ra'o tuzioli.

¹⁶ Netza' ta udilo' Adán, binacan cabë' tadya'a rue Diuzi quiero gunnë' ra'o yela' neban tuzioli. Tanun quie ta udilo' Adán, biuzãque' ilë'ë Diuzi ra'o ben' laxta'o yëri. Pero por nun quie tadya'a bë Diuzi quiero ra'o, rlë'ënë' ra'o ben' laxta'o yëri, bezi'zënë' tazë quiero ca naca dula' xquia quiero.

¹⁷ Guta' yela' guti quie yaca benë' tanun quie ta udilo' tuzi be'mbyu. Pero yaca ben' rue quie xti'idza' Diuzi, hualë'ë Diuzi leyaquë' ben' laxta'o yëri, huela'iya Diuzi leyaquë', huata' yela' neban cubi quieyaquë' por nun quie yela' bzu di'idza' quie tuzi be'mbyu Jesucristo.

¹⁸ Tanun quie ta udilo' Adán guta' tu castigo lao yuguluro. Pero tanun quie yela' bzu di'idza' quie Jesucristo, hualë'ë Diuzi yugulu ben' rue quie xti'idzë' ben' laxta'o yëri, bigata' castigo quieyaquë'.

¹⁹ Cani nacan. Tanun quie ta udilo' tuzi be'mbyu, blë'ë Diuzi yuguluro ben' napa dula' xquia. Pero tanun quie yela' bzu di'idza' quie tuzi be'mbyu, rlë'ë Diuzi ra'o ben' binapa dula' xquia.

²⁰ Udixu Diuzi ley quienë' lao yedyi layu ta ulu'en lega napajë' xquia. Pero tu yu'uyaquë' rueyaquë' xquia zẽ, lëscan' beyëchi'la'adyi' Diuzi leyaquë' tazë.

21 Cani nacan. Tanun quie dula' xquia napa yaca benë', quie lena' guta' yela' guti quiejë'. Pero lëscan' tanun quie yela' ben' huen quie Diuzi, quie lena' guta' ilë'ënë' ra'o ben' laxta'o yëri, hue'në' ra'o yela' neban tuzioli por nun quie Señor quiero Jesucristo.

6

Bira gacaro pensari huero tamala, reya'ala' gacaro pensari gaparo Cristo bala'ana

¹ ¿Ca bi pensari reya'ala' huero?

² ¿Huero pensari huero tamala cuenda ulu'e Diuzi ra'o ca naca yela' ben' huen quienë' ina'në' ra'o nacala gaca quiero? ¡Bireya'ala' huero pensari cana'! Naca quiero ca quie ben' baguti, bira rnabë' dula' xquia quiero ra'o. ¿Cómo pues huero seguir huero xquia?

³ ¿Binezile ca guca quiero dza gucaro bautismo? ¿Binezile gucaro bautismo ta ulu'en banacalëro Cristo Jesús tuzë, lëscan' ta ulu'en banaca quiero ca quie ben' guti lë'ë yaga cruzo?

⁴ Tanun quie gucaro bautismo naca quiero ca quie ben' baguti, ben' bade lu'u yerobá conlë Cristo. Pero lëscan' naca quiero ca quie ben' babeban, ben' bade yela' neban cubi quie. Naca quiero ca quie ben' beban cabë' beban Cristo, bebannë' lao na'a Diuzi, ben' de yela' huaca quie.

⁵ Porque chi tanun quie yela' guti quie Cristo naca quiero ca quie ben' huati, na' nacalëro lëbë' tuzë, lëscan' tanun quie yela' beban quie Cristo naca quiero ca quie ben' beban, na' lëscan' quie lena' nacalëronë' tuzë.

⁶ Caora guti Cristo lë'ë yaga cruzo, caora na' guca quiero ca quie gutirë pensari mala quiero cuenda bira huero ta rnazin quiero, bira inabë' pensari mala ra'o, bira ru'en lato huero mandado ca mandado rue pensari mala quiero ra'o.

⁷ Porque bira saque' inao benë' pensari mala quieyaquë' cati bagutiyaquë'.

⁸ Chi tali apsanro tamala quiero, lena' rulu'en anaca quiero ca quie ben' bagutilë Cristo. Cana' xela'adyi'ro huazulëro lëbë' tuzioli.

⁹ Porque neziro caora beyudyi guti beban Cristo, na'ra tuzioli bira gatinë'. Bira saque' hue yela' guti lëbë' gan tatula.

¹⁰ Caora guti Cristo lë'ë yaga cruzo, para tuzioli udizüguë' quie dula' xquia quiero. Na'ra nabannë' zuë' guibá naquë' ben' bala'ana zë lao Diuzi.

¹¹ Na'ra quie le'e, bira gacale pensari huele tamala, reya'ala' gacale pensari gapale Diuzi bala'ana como dan' nacalële Cristo Jesús, ben' naca Señor quiero, tuzë.

¹² Quie lena' bihue'le lato inabë' pensari mala quiele le'e huele ca tamala rnan guicho laxta'ole huele.

¹³ Bihue'le lato huelële cuerpo quiele tamala. Ta reya'ala' huele, huelële Diuzi tuzë como dan' banaca quiele ca quie ben' baguti, ben' beban lao na'anë'. Ta reya'ala' huele, hue'le lato huelële cuerpo quiele tadya'a.

¹⁴ Porque bira saque' inabë' pensari mala quiele le'e. Bira nadele cuenda lao na'a ley pca'n Diuzi lao na'a Moisés, banadele cuenda lao na'a

yela' reyëchi'la'adyi' quie Diuzi.

Ni rguixogue'n tu di'idza' cabë' naca quie ben' zu lao xa'ne

¹⁵ ¿Na'ra bizĩ huero? ¿Huero xquia como dan' bira nadero cuenda lao na'a ley pca'n Diuzi lao na'a Moisés, dechan' nadero cuenda lao na'a yela' reyëchi'la'adyi' quie Diuzi? ¿Bisaque' huero can'!

¹⁶ Pero dyë'ëdi nezile cabë' naca quie nu ben' zu lao xa'ne. Re'en ca re'enna uzujë' di'idza' ca mandado rue xa'ne. Cana' naca quiero. Chi uzuro di'idza' cabë' mandado rue pensari mala quiero, lena' udyiagui'n ra'o, biyezi' Diuzi ra'o gunnë' yela' naban quiero tuzioli. Chi uzuro di'idza' ca mandado rue Diuzi, lena' gacalën ra'o yezi' Diuzi ra'o gunnë' yela' naban quiero tuzioli.

¹⁷ Pero xcale Diuzi, bira rzule di'idza' ca mandado rue pensari mala quiele, cabë' bële dza na'te. Pero na'a baruzule di'idza' du guicho du la'adyi'le ca mandado rue xti'idza' Diuzi ta pca'nnë' laohuele.

¹⁸ Banacale ben' libre ta huele tadya'a inaole xneza Diuzi.

¹⁹ (Tanun quie dan' binetziõe'ele dyë'ëdi cabë' rnia' le'e, lena' rnia' le'e itu chopa la'ana ta gacalën le'e.) Cani nacan. Cabë' bële dza na' ulisa ni'a na'ale bële tamala, bële ta bireya'ala' huele, cana' hualisa ni'a na'ale huele tadya'a, huele ta reya'ala' huele, tacuenda talicazi nacale ben' quie Diuzi.

²⁰ Caora neyu'ule pensari mala dza na', unabë'n le'e ca xa'nle, quie lena' bibzule pensari huele tahuen ca tahuen re'en Diuzi huele.

21 ¿Pero bizĩ bële gan unaole neza mala? Na'ra lena' ruen yela' stu' quiele. Zë'lao ituza yela' guti ulezale yeyole lao gui' gabila.

22 Pero na'a bira yu'ule pensari mala inabën le'e ca xa'nle. Baoyu'ule pensari quie Diuzi ta huele tahuen ca re'en Diuzi huele. Cana' sí huele gan. Cana' talicazi nacale ben' quie Diuzi. Ze'lao cana' gun Diuzi yela' neban ta biyeyudyi yedu quie.

23 Ga yeyudyi gazõ dula' xquia quiero yeyoro lao gui' gabila. Pero netza' quie Diuzi gunnë' yela' neban quiero tuzioli tanun quie nacalëro Cristo Jesús, ben' naca Señor quiero, tuzë.

7

Ni rguixogue'n tu di'idza' cabë' naca quie tu nigula bazulë be'mbyu

1 Bicha', le'e nuebë'le nezile bi nan lë'ë guichi ley pca'n Diuzi lao na'a Moisés. Nezile rnabë' guichi ley na' ra'o solamente dza nebanro rdaro lao yedyi layu.

2 Rnia' le'e tu di'idza'. Cani nacan quie tu nigula bazulë be'mbyu. Biru'e guichi ley na' lato usan nigula be'mbyu quië' tu nenebannë' nerda be'mbyu quië' lao yedyi layu. Pero chi baguti be'mbyu quië', anaquë' libre yezi'në' ben' tula. Bira naca quië' be'mbyu na' lao guichi ley.

3 Quie lena' chi baptilë' be'mbyu tula tu neneban be'mbyu quië', na'ra xquia ruenë' quienë'. Pero chi baguti be'mbyu quië', anaquë' libre yezi'në' ben' tula, bira naca quië' be'mbyu na' lao guichi ley. Bibi dula' xquia de quienë'.

⁴ Lëscan' cana' nacan quiele, bicha'. Le'e banacalële Cristo tuzë. Banaca quiele ca quie nigula baguti xquiuhue. Bira nacale cuenda lao guichi ley pca'n Diuzi lao na'a Moisés. Banacale cuenda quie Cristo, ben' baguti beban. Cana' naca quiero nacaro ladyina'a Diuzi.

⁵ Na'ra cabë' guca quiero dza na'te, bëro ta rnazin quiero. Unan quiero huero ta biru'en lato huero lë'ë guichi ley pca'n Diuzi lao na'a Moisés. Tanun quie biru'en lato huero bi cosa lë'ë guichi ley na', lena' unan quiero uchisa ni'a na'aro huero tamala.

⁶ Pero bira inabë' guichi ley pca'n Diuzi lao na'a Moisés ra'o. Nacaro libre huero ca re'en Diuzi huero, bayu'uro pensari quienë' ta yecubinë' pensari quiero. Bira naca quie guichi ley na' para inabë'n ra'o.

Ni rguixogue'n quie pensari mala yu'u lu'u guicho laxta'oro

⁷ Na'ra, ¿ca bizï inaro? ¿Inaro naca guichi ley na' tamala? ¡Bireya'ala' inaro cana' como dan' binaca guichi ley na' tamala! Pero rguixogue'cazin ra'o cabë' naca tamala. Ni siquiera binezida' tamala na' rza'la'adyi'ro ta de quie laguedyiro, chi birguixogue'n lë'ë guichi ley na' de que: “Bireya'ala' sa'la'adyi'ro ta de quie laguedyiro.”

⁸ Pero tanun quie rguixogue' guichi ley na' cabë' bireya'ala' huero, quie lena' uzulao pensari mala quia' huen në'ëdi' mandado hua' ta rnazin quia'. Porque según cabë' rguixogue' lë'ë guichi ley na', cana' ineziro bi huero huero tamala, bi huero huero tahuen.

9 Guca tu ta guca tiempo biunezda' cabè' rguixogue'n lè'è guichi ley na'. Quie lena' biunezda' de dula' xquia quia'. Pero caora bdyin hora unezda' cabè' rguixogue'n lè'è guichi ley na', caora na' za' pensari mala quia', bëlèn nē'ēdi' ta hua' ta biru'en lato hua'. Caora na' unezda' de dula' xquia quia', huaca hue Diuzi nē'ēdi' castigo.

10 Ulèchi Diuzi guichi ley quienē' ta gacalēnē' yaca ben' nita' lao yedyi layu cuenda suyaquē' contento. Pero por tu parte quia' nē'ēdi', lao na'a Diuzi unezda' de dula' xquia quia', huen zūdyi huenē' nē'ēdi' castigo. Cana' guca quia'.

11 Tanun quie guichi ley na', aozī' pensari mala quia' nē'ēdi' yē'. Cana' guta' dula' xquia quia', bēn zūdyi hue Diuzi nē'ēdi' castigo.

12 Pero naca la'iya guichi ley pca'n Diuzi lao na'a Moisés. Naca la'iyan, nacan li, nacan huen ca mandado rue lao guichi ley na'.

13 Na' inaba' le'e tu pregunta, ¿naca dula' quie guichi ley na' guta' dula' xquia quia', huen zūdyi hue Diuzi nē'ēdi' castigo? ¡Binacan cana'! Binaca dula' quie guichi ley na', nechan' dula' quie dula' xquia quia'. Conlè ta naca tadya'a uzī' dula' xquia quia' nē'ēdi' yē'. Cana' naca dyin quie guichi ley quie Diuzi. Nacan ta ulu'en ra'o ca tamala gula naca dula' xquia quiero.

14 Neziro nusa'a guichi ley na' pensari quie Diuzi, pero nē'ēdi' biyu'a pensari quie Diuzi, yu'a pensari mala ca pensari yu'u yaca ben' nita' lao yedyi layu.

15 Binezda' bi ruen quia'. Tu ta bireya'ala' hua', lèlena' rua', la'acazi nezda' tamala na'.

16 Pero chi rua' tu ta bireya'ala' hua', lena' rulu'en nezda' naca dya'a guichi ley quie Diuzi.

17 Pensari mala quia' yu'u lu'u guicho laxta'ohua', lena' rnabë'n në'ëdi' hua' tamala. Raca quia' ca quie ben' tula, ben' mala, rnabë'në' në'ëdi'.

18 Nezda' ca naca pensari yu'a në'ëdi'. Biyu'a pensari dya'a ca pensari quie Diuzi. Yu'a pensari mala ca pensari yu'u yaca ben' nita' lao yedyi layu. Rnën lu'u guicho laxta'ohua' hua' tahuen, pero bigaca' hua'n.

19 Birua' tadya'a cabë' re'enda' hua', nechan' tamalala rua', ta bire'enda' hua'.

20 Na'ra chi birua' tadya'a cabë' re'enda' hua', lena' ulu'en rnabë'n pensari mala quia' në'ëdi'. Raca quia' ca quie ben' tula, ben' mala rnabë'në' në'ëdi'.

21 Cana'naca ta raca quia'. Cati ruzua' pensari hua' tahuen, cana' reyudyi quia' tamalala rua'.

22 Nezicazida' naca huen guichi ley quie Diuzi.

23 Pero lëscan' nezda' ca naca pensari yu'u lu'u guicho laxta'ohua', yu'un pensari mala ca pensari yu'u yaca ben' nita' lao yedyi layu. Na'ra bire'en pensari mala quia' hua' tahuen cabë' re'enda' hua'. Cana' rnabë'n pensari mala quia' në'ëdi'. Raca quia' ca quie ben' yu'u lu'u dyiguiba, ben' binaca libre.

24 ¡Bayëchi' gula raca quia'! ¿Nuži gacalë në'ëdi' usana' pensari mala yu'u lu'u guicho laxta'ohua', pensari re'en udyiagui'n në'ëdi'?

25 Tuzi Diuzi gacalënë' në'ëdi' lao na'a zī'inë' Jesucristo, ben' naca Señor quiero. ¡Xcale Diuzi tazë bagucalënë' në'ëdi' como cabë' guca quia',

gu'unda' hua' mandado ca mandado rue lao guichi ley quie Diuzi, pero biguca' como dan' unabë'n pensari mala quia' në'ëdi'. Unabë'n në'ëdi' cabë' r nabë' ben' naca xa'n tamala.

8

Racalë pensari quie Diuzi yu'u lu'u guicho laxta'oro ra'o

¹ Na'ra bigata' castigo quie ben' nacalë Cristo Jesús tuzë. Bira inabë' pensari mala ra'o ca pensari mala yu'u lu'u guicho laxta'o yaca ben' nita' lao yedyi layu, nechan' inabë'cazi pensari quie Diuzi yu'u lu'u guicho laxta'oro ra'o.

² Dyin quie pensari quie Bichi Be quie Diuzi yu'u lu'u guicho laxta'oro, lena' uselan ra'o gacaro libre. Birabi dula' xquia quiero gata' lao Diuzi huenë' ra'o castigo. Lëscan' dyin quie pensari quie Diuzi gata' yela' neban quiero tuzioli tanun quie dan' nacalëro Cristo Jesús tuzë.

³ Porque bë Diuzi gan bënë' ta biuzãque' hue guichi ley pca'nnë' lao na'a Moisés. Tanun quie pensari mala yu'u lu'u guicho laxta'oro, biuzãque' yeguba guichi ley na' dula' xquia quiero. Quie lena', use'ela' Diuzi zĩ'inë' ta yegubë' dula' xquia quiero. Guquë' be'mbyu ca ra'o, ben' de dula' xquia quie, pero lëbë' bibi dula' xquia quië' de. Cana' bë Diuzi use'ela'në' zĩ'inë' gutinë' lao lazaro guquë' ca gun hue'ro Diuzi ta yezĩ dula' xquia quiero. Na' bizĩ lao na'a zĩ'inë' guquë' be'mbyu bidë' lao yedyi layu, bënë' gan begubë' dula' xquia quiero ta bira inabë'n ra'o.

⁴ Cana' bē Diuzi gucalēnē' ra'o tacuenda huero tadya'a con cabē' rnan lē'ē guichi ley quienē'. Bira inaoro huero ca naca pensari mala yu'u lu'u guicho laxta'oro ra'o, ben' de dula' xquia quie. Pero inaoro huero ca naca pensari quie Bichi Be quie Diuzi yu'u lu'u guicho laxta'oro.

⁵ Yaca ben' nao ca naca pensari mala yu'u lu'u guicho laxta'ojē', lega raxeyaquē' huejē' ta rnazin quiejē'. Pero yaca ben' nao ca naca pensari quie Bichi Be quie Diuzi yu'u lu'u guicho laxta'ojē', lega raxejē' uzujē' di'idza' ca mandado rue Diuzi.

⁶ Chi inaoro huero ca naca pensari mala yu'u lu'u guicho laxta'oro, lena' udyiagui'n ra'o lao Diuzi. Pero chi inaoro huero ca naca pensari quie Bichi Be quie Diuzi yu'u lu'u guicho laxta'oro, lena' gata' yela' neban quiero biyeyudyi yedu quie, huabe' chizi laxta'oro.

⁷ Naca enemigo quie Diuzi yaca ben' nao rue pensari mala ca pensari mala yu'u lu'u guicho laxta'ojē'. Nica re'enjē', nica nezijē' bi huejē' ta huejē' mandado ca mandado rue lao guichi ley quie Diuzi.

⁸ Yaca ben' raxe hue pensari mala ca pensari mala yu'u lu'u guicho laxta'ojē', biilē'ē Diuzi lējē' gusto cabē' rueyaquē'.

⁹ Pero le'e binacale ben' nao rue pensari mala ca pensari mala yu'u lu'u guicho laxta'o yaca ben' nita' lao yedyi layu. Nacale ben' nao rue pensari quie Bichi Be quie Diuzi, como dan' yu'u pensari quiē' lu'u guicho laxta'ole. Nu ben' biyu'u pensari quie Cristo lu'u guicho laxta'ohue, binaquē' ben' quie Cristo.

10 Chi nacalëro Cristo tuzë, la'acazi gati cuerpo quiero tanun quie dula' xquia quiero, pero ca naca quie bichi be quiero, bigatin nabannan como dan' nacalëro Cristo tuzë rlë'ë Diuzi ra'o ben' bira de dula' xquia quie.

11 Quie lena' chi tali yu'uro pensari quie Bichi Be quie Diuzi lu'u guicho laxta'oro, la'acazi gatiro, useban Diuzi ra'o gunnë' yela' neban cubi ta biyeyudyi yedu quie. Na' Diuzi, ben' pseban Cristo Jesús, lëlebë' usebannë' ra'o lao na'a Bichi Be quienë', ben' yu'u lu'u guicho laxta'oro.

12 Cani nacan bicha', nacaro obligado, pero binacaro obligado huero inaoro con cabë' rna pensari mala yu'u lu'u guicho laxta'oro.

13 Porque chi huero inaoro ca rue pensari mala yu'u lu'u guicho laxta'oro, na'ra bë' gatiro, bigata' yela' neban tuzioli quiero. Pero chi hue quiero con cabë' rna Bichi Be quie Diuzi, chi bihuero cuenda con cabë' rna pensari mala yu'u lu'u guicho laxta'oro, na'ra bë' gatiro, huata' yela' neban quiero tuzioli.

14 Naca zï'i Diuzi yugulu ben' nao ruzu di'idza' con cabë' rna Bichi Be quienë'.

15 Ca naca pensari bdze' Diuzi lu'u guicho laxta'oro, binacan pensari ta idzebiro ca idzebi ben' zu lao xa'n tamala. Pero tanun quie pensari quië' yu'un lu'u guicho laxta'oro, nacaro zï'inë', na' yëbironë': "Xuza' Diuzi."

16 Racalë pensari quie Bichi Be quie Diuzi pensari quiero ta xela'adyi'ro nacaro zï'i Diuzi.

17 Dan' nacaro zï'i Diuzi, cana' gunnë' ra'o ca ta unë' gunnë' ra'o dza na'te. Conlë Cristo gata' yela' neban quiero tzesulëronë' tuzioli. Na' chi raca

zēdi quiero dza rdaro lao yedyi layu tanun quie naoro xneza Cristo, lēscan' huadyin dza yedyinro guibá tzahuero tuzē len Cristo.

¹⁸ Tazē tazēdi de quiero dza rdaro lao yedyi layu tanun quie dan' naoro xneza Cristo, pero cati abedyinro guibá inaro tadao' bicu' tazēdi guca quiero. Inaro nacara tahuen gula gaca quiero cati bedyinro guibá.

¹⁹ Yugulu ta udixu Diuzi lao yedyi layu rbezan dza yedupa yedzaga yugulu ben' naca zī'i Diuzi guibá.

²⁰ Yugulu ta udixu Diuzi lao yedyi layu naca bayēchi' quien, pero cala dula' quien naca bayēchi' quien. Dyin bē Diuzi naca bayēchi' quien, pero bzucazi Diuzi dza, dza yecubinē' yeyuenē' yugulu ta de lao yedyi layu.

²¹ Huadyin dza yezī yeyēri yugulu ta udixu Diuzi lao yedyi layu. Bira gaca bayēchi' quien, bira yedzagalaona. Huega'n tzao'na dza zuro guibá nacaro libre ra'o, ben' naca zī'i Diuzi. Lēdza na' yega'n dya'a gula quiero.

²² Neziro redzagalao yugulu ta udixu Diuzi lao yedyi layu ca quie redzagalao nu nigula re'en galo xcuidi' quie.

²³ Calatuzi ta udixu Diuzi lao yedyi layu redzagalaona, pero lēscan' ra'o, ben' nao xnezē', redzagalaoro la'acazi yu'u pensari quie Bichi Be quie Diuzi lu'u guicho laxta'oro. Bablē'ëro tadya'a na' yu'uro pensari quie Bichi Be quie Diuzi. Neziro huadyin dza inabē' puro pensari quie Bichi Be quie Diuzi ra'o, bira inabē' pensari quiero ra'o. Lega rbezaro dza yezi' Diuzi ra'o nacaro zī'inē' sulëronē' naquē' Xuzi. Na' dza

na' yecubi Diuzi cuerpo quiero ta iyacan cuerpo dya'atzegue, cuerpo bicuiagui'n.

²⁴ Lédza na' rbezaro gaca quiero con cabè' una Diuzi gaca quiero tanun quie bapte pselanè' ra'o. Chan' baguca quiero tu ta ulezaro gaca quiero, na'ra bira zu cuezaro gaca quiero.

²⁵ Pero chi binegaca quiero tu ta cuezaro gaca quiero, na'ra ruen zi cuezaro dyè'èdi idyin dza gaca quiero cabè' rbezaro gaca.

²⁶ Lëscan' racalè pensari quie Bichi Be quie Diuzi ra'o ga racarò falta. Nica neziro hue'lëro Diuzi di'idza' ca reya'ala' huero. Pero ca pensari quie Bichi Be quie Diuzi yu'u lu'u guicho laxta'oro, con len racalën ra'o ulidzaro Diuzi cabè' reya'ala' ulidzaronè' nun quie dan' biredzelerò bi di'idza' yëbironè'.

²⁷ Rezi' Diuzi cuenda ca naca pensari yu'u lu'u guicho laxta'oro. Nezi Diuzi bi na Bichi Be quienè', porque rulidza Bichi Be quienè' lëbè' conforme ca re'en Diuzi gaca quie yaca ben' quienè', yaca ben' nao xnezè'.

Con bitezi tazèdi gaca quiero huero gan

²⁸ Neziro con bitezi gaca quiero, huacalè Diuzi ra'o yega'nro huen, ra'o, ben' dyè'è Diuzi, ra'o, ben' ulionè' según ca unanè' huenè' quiero dza na'te.

²⁹ Desde dza na'te nezi Diuzi huadyin dza sudyi'ilëronè'. Cana' psere Diuzi ra'o dza na'te ta yedyinro iyacaro ta gacaro cabè' naca zī'inè' Cristo. Cana' yedyin Cristo naquè' ben' belaora lao yaca ben'rzudyi'ilè Diuzi.

³⁰ Na'ra como psere Diuzi ra'o dza na'te ta gacaro ben' quienë', lëscan' uliorënë' ra'o ta huero mandado quienë'. Na'ra como ulionë' ra'o huero mandado quienë', lëscan' pca'nrënë' ra'o ben' laxta'o yëri. Na'ra como pca'nnë' ra'o ben' laxta'o yëri, lëscan' bërënë' ra'o ben' bala'ana, ben' inita'lë lëbë' guibá.

³¹ Quie lena', ¿ca bi pensari reya'ala' huero? Pues como zu Diuzi racalënë' ra'o, nunu gaca udyiagui' ra'o.

³² Na'ra como bibeguë' Diuzi guida zĩ'inë', pero use'ela'cazine' lëbë' lao yedyi layu ta gutië' lë'ë yaga cruzo lao lazaro, lëscan' biyeguë' Diuzi gunnë' ra'o yugulu tahuen ta rdzioguero nuzuë' zĩ'inë' Jesucristo ta gacalënë' ra'o.

³³ ¿Nuži napa derecho gao ra'o xquia, ra'o, ben' ulio Diuzi? Naca cuin Diuzi ben' pca'n ra'o ben' laxta'o yëri.

³⁴ ¿Nuži napa derecho ichuguli quiero gacaro castigo? Naca cuin Cristo ben' guti lë'ë yaga cruzo pseban Diuzi lëbë', zuë' cuëta lë'ënë' zaquë' yebë, rulidzë' lëbë' por ra'o.

³⁵ Con bitezi gaca quiero biyeyudyi yedu nadyë'ë Cristo ra'o. La'acazi redzagalaoro, la'acazi raca zëdi quiero, la'acazi rueljë' ra'o bizinaquezi, la'acazi bide ta gaoro, la'acazi bide zāba quiero, la'acazi naca zūdyi quiero, la'acazi ruzegadyijë' gutijë' ra'o, biyeyudyi yedu nadyë'ë Cristo ra'o.

³⁶ Rguixogue'n lë'ë guichi la'iya quie Diuzi ca tazëdi gaca quiero cani:
Tanun quie rdza' yaca benë' dan' naoro xneza
Diuzi, cana' re'enjë' gutijë' ra'o.

Ca ruti ja benë' beco' zĩ'ila' yugu dza, cana'
re'enjë' gutijë' ra'o.

Cana' rnën lë'è guichi la'iya.

³⁷ Na'rnia' le'e, con bitezi tazëdi za' gaca quiero,
huero gan como dan' zu Cristo napë' ra'o
cuidado nadyë'ënë' ra'o.

³⁸ Nezda' dyë'ëdi con bitezi za' gaca quiero,
biyeyudyi yedu nadyë'ë Diuzi ra'o. La'acazi guti
benë' ra'o, la'acazi gaca zëdi quiero dza rdaro lao
yedyi layu, la'acazi rue yaca ángel condre ra'o,
la'acazi ruelë yaca taxi'ibi' ra'o bizinaquezi,
la'acazi bi raca quiero na'a, la'acazi bi raca
quiero uxe huidzo,

³⁹ la'acazi bi raca quiero guibá, la'acazi bi raca
quiero lao yedyi layu, la'acazi nuti'tezi za' huelë
ra'o bizinaquezi, biusanla'adyi' Diuzi ra'o,
biyeyudyi yedu nadyë'ënë' ra'o como dan'
nacalëro Cristo Jesús, ben' naca Señor quiero,
tuzë.

9

Ulio Diuzi ben' Israel dza na'te

¹ Tali rnia' le'e, como naca' ben' quie Cristo,
quele yë' rzi'a. Cabë' rnia' le'e nacan tali, como
dan' yu'u pensari quie Bichi Be quie Diuzi lu'u
guicho laxta'ohua'.

² Lega rdëbida' quie ben' yedyi quia'. Lega raca
bayëchi' lu'u guicho laxta'ohua' por lëjë'.

³ Zua' dispuesto udze'de' Diuzi në'ëdi', zua'
dispuesto usanla'adyi' Cristo në'ëdi', zua'
dispuesto bi ta gaca quia', chan' gaca tahuen
quie yaca ben' yedyi quia'.

4 Nacajë' ben' Israel, ben' naca zĩ'isuba xuzixta'ohua' Jacob. Rlë'ë Diuzi leyaquë' ca quie zĩ'inë'. Uzulë Diuzi leyaquë' dza na'te, blu'enë' leyaquë' yela' huaca quië'. Udixogue'në' leyaquë' ca unanë' huenë' quiejë'. Pca'nnë' guichi ley quienë' lao na'a laguedyijë' Moisés. Gudyinë' lëjë' ca reya'ala' huejë' ta tzionla'adyi'jë' lëbë'. Yega'nlënë' leyaquë' di'idza' ca huenë' gacalënë' leyaquë'.

5 Nacajë' zĩ'isuba yaca xuzixta'ohua', ben' unita' dza na'. Caora bida Cristo, ben' use'ela' Diuzi, guquë' be'mbyu naquë' zĩ'isuba yaca ben' Israel. Lëbë' naquë' Diuzi, ben' rnabë' lao yugulute. Naquë' ben' la'iya tuzioli. Amén.

6 Pero quele inia' biuzu Diuzi di'idza' ca di'idza' bega'nlënë' ben' Israel. Cala yugulu ben' Israel nacajë' dugalo ben' quie Diuzi.

7 Lëscan' cala yugulu ben' Israel nacayaquë' dugalo zĩ'isuba xuzixta'ohua' Abraham según ca naca di'idza' bega'nlë Diuzi Abraham, porque una Diuzi rëbinë' Abraham: "Lao na'a zĩ'ilo' Isaac huanita' dugalo zĩ'isubo'."

8 Quie lena' reya'ala' tzioñe'ero cala yugulu ben' Israel nacayaquë' dugalo ben' quie Diuzi. Balazi ben' Israel, ben' rue quie xti'idza' Diuzi, leyaquë' nacayaquë' dugalo ben' quie Diuzi, dugalo ben' zĩ'isuba Abraham.

9 Porque cani naca di'idza' bega'nlë Diuzi Abraham: "Caora babedyin hora, huedena'a luë' huela'iya' zǵulo' Sara cuenda hua'anë' xcuidi' quio'." Cana' tzioñe'ero naca ben' rue quie xti'idza' Diuzi dugalo ben' quie Diuzi como dan' naca quieyaquë' ca quie Isaac, ben' golo de

acuerdo con cabë' di'idza' bega'nlä Diuzi Abraham.

¹⁰⁻¹³ Dera mazara di'idza' re'enda' inia' le'e. Caora babgula Isaac, na' bi'a nigula quië' Rebeca xcuidi' guidi'. Na'ra una Diuzi rëbinë' nigula quië' Isaac: "Huanabë' bidao' galo taorupe lao bidao' golo tanëro." Lena' naca de acuerdo con ca una Diuzi cani: "Huela'iya' Jacob, pero bihuela'iya' Esaú." Cana' una Diuzi la'acazi binégalo yaca xcuidi' guidi', binehuejabi' tahuen, binehuejabi' tamala. Lena' ineziro napa Diuzi derecho huela'iyane' nu ben' re'enne' huela'iyane', biruenë' cuenda la'acazi bëjë' tahuen, la'acazi bëjë' tamala.

¹⁴ ¿Biži inaro chi? ¿Inaro birue Diuzi tadya'a? ¿Bireya'ala' inaro birue Diuzi tadya'a!

¹⁵ Porque cani una Diuzi rëbinë' Moisés dza na'te: "Hueyëchi'la'adya' nu ben're'enda' yeyëchi'la'adya'. Idyë'ëda' nu ben' re'enda' idyë'ëda'."

¹⁶ Quie lena' inia' le'e, cala ra'o huero mandado yeyëchi'la'adyi' Diuzi ra'o, nechan' según ca mandado hue cuinnë' yeyëchi'la'adyi'në' ra'o.

¹⁷ Lë'ë guichi la'iya' quie Diuzi rguixogue'n ra'o cabë' una Diuzi gudyinë' ben' naca rey quie nación Egipto dza na'. Cani una Diuzi rëbinë' lëbë': "Baolioga' luë' gaco' rey ta il'ë yugulu benë' ca naca yela' huaca quia', lëscan' ta huebëjë' në'ëdi' duzë yedyi layu."

¹⁸ Quie lena' inia' le'e, cani naca quie Diuzi: Reyëchi'la'adyi'në' nu ben' re'enne' yeyëchi'la'adyi'në'. Lëscan' usanla'adyi'në' nu ben' re'enne' usanla'adyi'në'.

19 Pero le'e inale: “Chi yugulu ta ruero nacan mandado quie Diuzi, na'ra ¿bixquien' rugapa Diuzi ra'o dula' xquia por nun quie ta ruero rdaro lao yedyi layu? ¿Tu ta re'en Diuzi gaca, bizí huero ta bigacan?”

20 Pero rnaba' le'e, ¿nuži nacaro tzu'uro huedila huenë lëro Diuzi? Rnia' le'e, binapa tu yeso' derecho inën yëbin ben' rue len: “¿Biquien' bzalolo' në'ëdi' cani?”

21 Pues napa ben' rue yeso' derecho si'në' gun', huenë' bitezi yeso' rapanë' gusto huenë'. Con tuzi gun' senë' napë' derecho huenë' yeso' tza'o, o huenë' yeso' corriente.

22 Napa Diuzi derecho idza'në' huenë' castigo nu ben' reya'ala' gata' castigo quie como dyë'ëdi rbeza Diuzi yetza'jë' pensari quiejë'.

23 Cana' bë Diuzi, dyë'ëdi ulezanë' quie yaca ben' unita' dza na'. Cana' blu'enë' ra'o naquë' ben' zëla'adyi', ben' reyëchi'la'adyi' ra'o. Desde dza na'te zuë' rbezë' ta udze'në' xnezi quiero tacuenda idyin dza tzasulëronë' guibá.

24 Ulio Diuzi ra'o lao rupa cue'ro len ben' Israel len ben' za' yedyi tula.

25 Lëcana' rguixogue'n lë'ë guichi la'iya quie Diuzi ta bë ben' lao Oseas: Huabio Diuzi yaca ben' za' yedyi tula ta gacajë' ben' quienë'.

Huadyë'ë Diuzi yaca ben' binaca ben' Israel, ben' nunu nadyë'ë.

26 Lëscan' lëyaca yedyi ga nita' ben' binuebë' Diuzi, ga una Diuzi: “Binacale ben' quia'.” Lëben' na' iyacajë' zī'i Diuzi, ben' neban tuzioli.

27 Pero quie ben' Israel una Isaías caora unë cani: "La'acazi naca ben' Israel tazëgula ca naca yozõ de ru'a nisadao', quele yugojë' inaojë' xneza Diuzi, tu chopazijë' inaojë' xneza Diuzi ute usela Diuzi lëjë'.

28 Tu sasazi uzu Diuzi di'idza' quienë' huenë' castigo lao duzë yedyi layu."

29 Lëscan' dza na'te unë Isaías cani:

Chi bipca'n Diuzi zï'isubaro lao yedyi layu dza
na', babega'nnan bayëchi' gula quiero
cabë' bayëchi' gula bega'nnan quie ben'
yedyi Sodoma len ben' yedyi Gomorra.

Cabë' naca quie yaca ben' Israel

30 ¿Ca bi pensari reya'ala' huero? Pues reya'ala' huero pensari de que yaca ben' binaca ben' Israel, ben' birnao guichi ley pca'n Diuzi lao na'a Moisés, pues baguca quiejë' rlë'ë Diuzi lëjë' ben' laxta'o yëri nun quie na' rzudyi'ilëjë' Jesús.

31 Pero netza'n quie ben' Israel. Nernaøjë' guichi ley pca'n Diuzi lao na'a Moisés tacuenda ilë'ë Diuzi leyaquë' ben' laxta'o yëri. Chan' dula'adyi'yaquë' ruzujë' di'idza' huejë' yugulu ca mandado rue lao guichi ley na', na'ra ilë'ë Diuzi leyaquë' ben' laxta'o yëri. Pero bibëyaquë' gan, bibzujë' di'idza' huejë' yugulu con cabë' rna lë'ë quichi ley na'. Quie lena' bibëjë' gan ilë'ë Diuzi lëjë' ben' laxta'o yëri.

32 ¿Bixquien' bibëjë' gan? Pues bibëjë' gan como dan' re'enjë' huejë' cuinzijë' ben' laxta'o yëri. Binezijë' ilë'ë Diuzi ra'o ben' laxta'o yëri por nun quie chi rzudyi'ilëro Cristo. Quie lena' naca

quiejë' ca quie ben' ucha'o yo, bgudyinë' yu tu neza, bibënë' gan idyinnë' ga zionë'.

³³ Lena' rguixogue'n quieyaquë' lë'ë guichi la'iya quie Diuzi cani:

Baose'ela' Diuzi zî'inë' lao yedyi quie ben' Israel, pero psebi'jë' lëbë'. Quie lena' raca quieyaquë' ca quie ben' ru'u yo ni'e, bgudyinë' yu tu neza.

Pero nu ben' rzudyi'ilë zî'inë', bigaca bayëchi' quienë', huega'nnë' huen.

10

¹ Bicha', du guicho du la'adya' rulidza' Diuzi re'enda' yetza' yaca ben' Israel pensari quieyaquë' gata' yela' neban quiejë' tuzioli.

² Nia' le'e tali na' re'enjë' tzionla'adyi'jë' Diuzi, pero binezijë' bi huejë'.

³ Binezijë' bi huejë' ta ilë'ë Diuzi lëjë' ben' laxta'o yëri. Na' re'enjë' huejë' cuinzijë' ben' laxta'o yëri. Racajë' pensari chi uzujë' di'idza' ca mandado rue lao guichi ley pca'n Diuzi lao na'a Moisés, cana' ilë'ë Diuzi lëjë' ben' laxta'o yëri.

⁴ Pero biruejë' ca re'en Diuzi huejë', porque tanun quie dan' inaoro xneza Cristo, cana' ilë'ë Diuzi ra'o ben' laxta'o yëri, cala porque dan' uzuro di'idza' ca mandado rue lao guichi ley quienë'.

⁵ Na'ra bzu Moisés di'idza' lë'ë guichi ta rguixogue'në' ra'o de quie chi tali uzuro di'idza'ca mandado rue lao guichi ley pca'n Diuzi lao na'anë', chi ni tu lasa bigaparo falta lao dza rdaro lao yedyi layu, na'ra por lena' gun Diuzi

ra'o yela' neban tuzioli. Pero nunu yezue hue gan huejë' cana'.

⁶ Pero ta gun Diuzi ra'o, gunnë' yela' neban quiero tuzioli tanun quie dan' rzudyi'ilëro Cristo. Biruen zi tzioro guibá tzexi'ro Cristo yeyëzinë' gacalënë' ra'o.

⁷ Lëscan' biruen zi yeyëziro ga nita' ben' huati tzexi'ro Cristo yeguidë' gacalënë' ra'o.

⁸ Pero ¿ca bizī rnan lë'ë guichi la'iya? Cani rnan: “Con di'idza' yero lu'u ru'aro, con pensari yu'u lu'u guicho laxta'oro, con lëzin gun Diuzi ra'o yela' neban quiero tuzioli.” Lena' rguixogue'ro benë'.

⁹ Porque chi inaro naca Cristo xuzi xa'nro zaquë'lao lao benë', chi yu'uro pensari tali na' pseban Diuzi lëbë', na'ra gun Diuzi ra'o yela' neban tuzioli.

¹⁰ Cani nacan: Tanun quie dan' yu'u pensari lu'u guicho laxta'oro pseban Diuzi Cristo, quie lena' ilë'ë Diuzi ra'o ben' laxta'o yëri. Lëscan' tanun quie di'idza' rero lu'u ru'aro inaro naca Jesucristo xuzi xa'nro zaquë'lao lao benë', quie lena' gun Diuzi ra'o yela' neban tuzioli.

¹¹ Lë'ë guichi la'iya rguixogue'n rnan caniga: “Nu ben' rzudyi'ilë lëbë', bigaca bayëchi' quienë' huega'nnë' huen.”

¹² Pues tuzi ca zaca'ro lao Cristo, la' acazi ben' Israel, la'acazi ben' za' yedyi tula, como dan' naca Cristo xuzi xa'n yuguluro, tazë huela'iyänë' nu ben' rulidza lëbë'.

¹³ Porque tali nacan ca nan lë'ë guichi la'iya cani: “Yugulu ben' uzëto laohuë', ben' ina naca Cristo xuzi xa'nnë', hue'në' leyaquë' yela' neban

tuzioli.”

14 Pero bisaque' uzëtoyaquë' laohuë' inayaquë' naca Cristo xuzi xa'nnë' chi birzudyi'ilëjë' lëbë'. Lëscan' bisaque' sudyi'ilëjë' lëbë' chi binenezijë' cabë' bënë'. Lëscan' bisaque' inezijë' cabë' bënë' chi nunu yëbi leyaquë'.

15 Lëscan' bisaque' yëbi benë' leyaquë' chi bizu ben' use'ela' lëjë'. Lëcana' nan lë'ë guichi la'iya quie Diuzi cani: “Tadya'a gula rue yaca ben' rguixogue' xti'idza' Diuzi.”

16 Pero cala yugulu benë' rue quieyaquë' con cabë' rna Diuzi' cuenda hue' Diuzi lëjë' yela' neban tuzioli. Nacan ca una Isaías dza na'te rëbinë' Diuzi: “Tu chopazi benë' rue quieyaquë' di'idza' la'iya quio' ta yëbindo'jë'.” Cana' unë' rëbinë' Diuzi.

17 Na'ra nia' le'e, chi yero uzënararo di'idza' la'iya quie Diuzi, lena' ruen mandado quiero sudyi'ilëro Cristo.

18 Pero rnaba' le'e tu di'idza': ¿Biži raca quie ben' Israel? ¿Raca quiejë' binezijë' con cabë' rna di'idza' la'iya quie Diuzi? Cala raca quiejë' cana'. Claro nezijë' con cabë' rna di'idza' la'iya quie Diuzi, porque rnan lë'ë guichi la'iya quie Diuzi cani:

Duzë yedyi ga rda ben' Israel nu'ayaquë' guichi ga yu'u di'idza' la'iya quie Diuzi.

19 Tatula rnaba' le'e: ¿Bi ca nale? ¿Nale binezi ben' Israel de que ulio Diuzi ben' za' yedyi tula ta gacayaquë' ben' quienë'? Pues nezijë', porque dza na'te, dza uda Moisés lao yedyi layu, bzunë' di'idza' lë'ë guichi con cabë' una Diuzi rëbinë' ben' Israel cani:

Tanun quie cuioga' ben' za' yedyi tula, ben'
binaca ben' Israel ta huela'iya' leyaquë',
cana' gacazë'le leyaquë'.

Tanun quie gacalia' ben' tula, ben' nale ben'
tondo, cana' idza'le leyaquë'.

²⁰ Lëscan' dza uda Isaías lao yedyi layu,
bibdzebinë' bzunë' lë'ë guichi con cabë' una
Diuzi cani:

Yaca ben' binaca ben' Israel, barnaoyaquë'
xneza'.

Yaca ben' binaca ben' Israel, baruela'iya'
leyaquë'.

²¹ Lëscan' dza na' una Isaías cabë' bë ja ben'
Israel unë' rëbinë' leyaquë': "Yugu dza rëbi Diuzi
lëjë', pero yela' yeladyi' quiejë' biruzë'nagajë'."

11

Baolio Diuzi bala ben' Israel

¹ Na'ra inaba' le'e: ¿Apsanla'adyi' Diuzi yaca
ben' Israel? Pues bipsanla'adyi' Diuzi leyaquë'.
Hasta në'ëdi' ulio Diuzi naca' ben' Israel. Naca'
zïco' zï' isuba Abraham. Naca' familia quie
Benjamín, ben' uzu tiempote.

² Desde dza na'te beyuebë' Diuzi ben' Israel
ulionë' lëjë' gacajë' ben' quienë'. Biusanla'adyi'
Diuzi leyaquë'. ¿Binezile con cabë' rnan lë'ë
guichi la'iya quie Diuzi ga rguixogue'n quie
profeta Elías? Bigala'adyi'le cabë' bë profeta
Elías, zuë' rulidzë' Diuzi udaohuë' yaca ben'
Israel xquia.

³ Unë' rëbinë' Diuzi: "Xuza' Diuzi, abëti ben'
Israel yugulu ben' rguixogue' di'idza' quio'.
Apquinuyaquë' labecugo ta nueyaquë' guixi'dao'

ga rionla'adyi'yaquë' luë'. Tuza' në'ëdi'
babega'na'. Lëzi bare'enjë' gutijë' në'ëdi'."

⁴ Pero na' una Diuzi gudyinë' lëbë': "Cala tuzo'
luë' bega'nlo'. Nenita' igadyi mila ben' naca ben'
quia', ben' birionla'adyi' ta pcha'a benë' najë'
Diuzi quiejë'."

⁵ Cabë' guca dza na'te, cana' racan na'a.
Nenita' tu chopa ben' Israel, ben' du guichi du
dula'adyi' rue quie xti'idza' Diuzi. Gusto quie
Diuzi baolionë' leyaquë' gacajë'ben' quienë'.

⁶ Porque cala ulio Diuzi lëjë' tanun quie dan' bi
cosa bëyaquë'. Chi tali rbio Diuzi ra'o tanun quie
bi cosa ruero, lena' huero obligado Diuzi cuionë'
ra'o gacaro ben' quië'. Pero bisaque' huero
obligado Diuzi, gusto quienë' rbionë' nu ben'
re'en cuionë' gaca ben' quienë'.

⁷ ¿Ca bizĩ inaro quie ben' Israel? Bibëjë' gan
yugulujë' gata' yela' neban quiejë' tuzioli. Yaca
ben' ulio Diuzi, lëjë' sí, bëjë' gan. Psanla'adyi'
Diuzi yaca los demás ben' Israel, ben' yaladyi'.

⁸ Cana' rguixogue'n lë'ë guichi la'iya quie Diuzi
cani: "Yela' yeladyi' quiejë' apchula Diuzi pensari
quiejë' ta bitzioñe'ejë' con cabë' rna di'idza' la'iya
quienë'. La'acazi rlë'ëjë' dyë'ëdi, ruejë' ca ben'
birlë'ë. La'acazi reyaquë' dyë'ëdi, ruejë' ca ben'
bire. Cana' raca quiejë' hasta na'adza."

⁹ Lëscan' quie ben' Israel una rey David dza
na' con cabë' rnën cani:

Ruen zūdyi quie ta de quiejë'.

Con ta raxejë' gaojë' yo'ojë', con ta raxejë' huejë',
lëlena' udyiagui'n leyaquë'.

Lëlena' uca'nnan leyaquë' mala lao Diuzi, huenë'
lëjë' castigo.

10 Huechula laoyaquë' ta biilë'ëyaquë' tuzioli.

Lëscan' gacajë' bego tuzioli.

Cana' una rey David dza na'te.

11 Na'ra inaba' le'e: ¿Yela' yeladyi' quie ben' Israel apsanla'adyi' Diuzi leyaquë' tuzioli? Cala tuzioli apsanla'adyi' Diuzi leyaquë'. Pero racalë Diuzi ben' binaca ben' Israel ta hue quieyaquë' xti'idzë', na' gata' yela' neban quiejë' tuzioli cuenda ilë'ë ben' Israel cabë' tahuen na' raca quie ben' binaca ben' Israel. Cana' huenan quie ben' Israel ínaojë' xneza Cristo gata'rë yela' neban quiejë' tuzioli.

12 Tahuen guca quie ben' binaca ben' Israel caora uquixi ben' Ísrael bibë quiejë' xti'idza' Diuzi. Pero huacara huen gula quie ben' binaca ben' Israel caora idyin dza inao yaca ben' Israel xneza Cristo, na' gata' yela' neban quiejë' tuzioli.

13 Pero re'enda' inia' le'e itu di'idza', le'e ben' binaca ben' Israel. Pues tanun quie dan' use'ela' Diuzi në'ëdi' ta quixogui'a le'e xti'idza' Diuzi, lena' nacan belao ca dyin quie Diuzi rua'.

14 Cana' rëpa' ben' Israel, ben' yedyi quia', cuenda huenan quieyaquë' inaoyaquë' xneza Cristo cabë' rnaole le'e, na' gata'rë yela' neban quiejë' tuzioli.

15 Caora blë'ë Diuzi bire'en ben' Israel inaoyaquë' xneza Cristo, na'ra udiloguë' yaca ben' za' yedyi tula, yaca ben' re'en inao xneza Cristo. Pero cala bire'en Diuzi inao ben' Israel xneza Cristo. Lega re'en Diuzi inaojë' xneza quienë'. Lega yedaohue Diuzi caora idyin dza inao yaca ben' Israel xneza Cristo. Lëdza na' gaca quiejë' ca quie ben' baguti beban tatula.

16 Chi banuela'iya Diuzi yëzo yëta xtila ta gaca pan, lëscan' naca la'iya pan ta bro lu'u horno. Lëscan' cana' nacan quie nu yaga. Chi banuela'iya Diuzi lue yaga, lëscan' naca la'iya taca' yaga. Lëscan' nacarë quie ben' Israel. Chi bë xuzixta'ojë' quie Diuzi, lëscan' idyin dza hue zïco' zï'isubajë' quie Cristo.

17 Naca yaca ben' Israel ca quie tu yaga olivo. Naca bala ben' Israel ca quie taca' yaga olivo. Yela' yeladyi' quiejë' baochugu apsanla'adyi' Diuzi lëjë', pero baozï' Diuzi le'e, ben'za' yedyi tula. Banaca quiele ca quie taca' yaga guixi' nadilaten yaga olivo. Cana' gaca huen quiele, na' huaca yezi'le fuerza quie Diuzi cabë' rezi' taca' yaga fuerza quie luena.

18 Pero bihuele cuinle ben' zë dan' baochugu Diuzi taca' yaga olivo, bë Diuzi quiele ca quie yaga nadilaten yaga olivo. Bigala'adyi'le cala por nun quie le'e nezi' lue yaga fuerza, dechan' por nun quie lue yaga nezi'le le'e fuerza.

19 Durpende yëbile në'ëdi': "Hue'encazi, pero baochugu Diuzi taca' yaga olivo tacuenda gaca nëto' ben' quienë' lao laza ben' Israel."

20 Pero rëpa'le'e: "Baochugu Diuzi taca' yaga olivo, inaro ben' Israel, como dan' psebi'jë' Cristo. Pero le'e, ben' binaca ben' Israel, por nun quie dan' barnaole xneza Cristo nacalële Diuzi tuzë. Quie lena' gapale cuidado bihuele cuinle ben' zë.

21 Cana' nacan porque bibezi'zë Diuzi nu ben' Israel, dan' psebi'jë' Cristo. Na'ra lëcana'zi huaca bisi'zë Diuzi nu ben' za' yedyi tula chi biinaojë' xneza Cristo.

22 Na' ulehuecara pensari ca naca yela' ben' huen quie Diuzi. Pero lëscan' naca Diuzi ben' de pensari. Dyë'ëdi rna'në' huenë' castigo nu ben' bire'en hue quie di'idza' quië'. Pero le'e, tazë bagucalë Diuzi le'e. Pero ruen zi inaole xneza Diuzi gapalenë' bala'ana, porque chi bihue quiele di'idza' quië', lëscan' le'e, hue Diuzi le'e castigo.

23 Porque chi ye utza' ben' Israel pensari quiejë' inaojë' xneza Cristo, na'ra yezi' Diuzi lëjë' utilanë' lëjë' yaga olivo tatula. Decazi yela' huaca quie Diuzi huenë' cabë' re'ennë' huenë'.

24 Pues ulio Diuzi le'e gacale ben' quienë', la'acazi nacale ca quie tu yaga guixi', la'acazi binacale ben' Israel, pero mazara gue'en Diuzi ben' Israel gacajë' ben' quienë' utilanë' lëjë' yaga olivo tatula.

Huadyin dza inao yaca ben' Israel xneza Cristo

25 Re'enda' inia' le'e tu di'idza' con cabë' baodixogue' Diuzi në'ëdi' cuenda inezile cabë' gaca, na' bihuele cuinle ben' zë. Tali na' apanla'adyi' Diuzi bala ben' Israel tanun quie yela' yeladyi' quiejë'. Pero caora abeya ben' re'en inao xneza Cristo, ben' za' yedyi' tula, na'tera yezulao Diuzi yeyuenë' ben' Israel tuzë tatula.

26 Lëdza na' sulao inao yugulu ben' Israel xneza Cristo. Cana' rguixogue'n lë'ë guichi la'iya quie Diuzi cani:

Lado ben' Israel huario tu ben' yedyi' quiejë', ben' uzioñe'e lëjë'.

Lëben' na' yegubë' tamala quie ben' Israel.

27 Cana' uzu Diuzi di'idza' con cabè' di'idza'
bega'nlnènè' xuzixta'o ben' Israel unè'
yezi'zènè' dula' quieyaquè'.

Cana' rnèn lè'è guichi la'iya quie Diuzi.

28 Pero na'a barue ben' Israel condre Diuzi.
Biralejè' guti Cristo lè'è yaga cruzo cuenda gata'
yela' neban quiejè' tuzioli. Pero como biralejè',
lena' rguilo Diuzi le'e, ben' za' yedyi tula, nu le'e
re'en inao xneza Cristo. Pero nadyè'ëcazi Diuzi
ben' Israel. Lena' ulionè' xuzixta'ojè' gacajè' ben'
quienè'.

29 Uzu Diuzi di'idza' quienè' cabè' unanè'
huenè'. Como ulio Diuzi ben' Israel gacajè' ben'
quienè', lena' biusanla'adyi'nè' leyaquè' tuzioli.

30 Lèle'e, ben' binaca ben' Israel, bibè quiele
quie Diuzi dza na'te, pero caora uru'un ben'
Israel Cristo tzala'la, na'ra bezulao Diuzi
yeyuenè' le'e tuzè beyèchi'la'adyi'nè' le'e.

31 Na'ra cala le'e, nechan' yaca ben' Israel,
lèleyaquè' birue quiejè' quie Diuzi. Pero huadyin
dza yeyèchi'la'adyi' Diuzi ben' Israel tatula
cabè'beyèchi'la'adyi'nè' le'e.

32 Porque tuzi ca bè Diuzi, baochugulinè' de
dula' xquia quie yuguluro. Na'ra quie lena' tuzi
ca huenè', yeyèchi'la'adyi'nè' yuguluro.

33 Biyeyudyi yedu yela' rioñe'e, yela' nezi quie
Diuzi. Bisaque' huebè'ro duzète ca naca pensari
quienè', ca naca xnezè'.

34 ¿Nuži saque' tzioñe'e duzète pensari quie
Diuzi? ¿Nuži saque' usèdi lèbè'?

35 Nunu saque' yèbi Diuzi: "Tu cani reya'alo'
quia'."

³⁶ Porque bzalo Diuzi yugulu ta de, yela' na' yugulu ta de nacan quienë'. Ben' zë, ben' bala'ana naca Diuzi tuzioli. Amén.

12

Ni rguixogue'n cabë' reya'ala' hue ben' quie Diuzi, ben' naca la'ia

¹ Na'ra, bicha', babeyëchi'la'adyi' Diuzi le'e. Quie lena' du guicho du la'adya' inia' le'e reya'ala' tzesanle cuinle lao Diuzi, huele cuinle ca gun quie Diuzi ta biyeyula yelen. Gacale ben' naca la'ia, cana' yeyula'adyi' Diuzi le'e. Cana' reya'ala' huele tzionla'adyi'le Diuzi.

² Bireya'ala' yenaole pensari mala quie ja ben' nita' lao yedyi layu. Reya'ala' yetza'le pensari quiele, yenaole xneza Diuzi cuenda yetza'nan quiele yugulu ca ruele. Cana' inezile ca re'en Diuzi huele, porque ca re'en Diuzi huero nacan ta gacalën ra'o, nacan ta yeyula'adyi'në' ra'o, nacan tadya'a gula.

³ Yela' ben' huen quie Diuzi ulionë' në'ëdi' ta uzioñe'eda' le'e. Lena' inia' le'e bireya'ala' huele cuinle ben' zë. Du guicho du la'adyi'le reya'ala' huele pensari dya'a según cabë' nue Diuzi quie quiele barue quiele xti'idza'në'.

⁴ Porque cani nacan: Tuzi cuerpo quiero naca, pero tazë netza' tu tu parte quien, tazë netza' dyin quie quien.

⁵ Lëscan' cana' naca quie ra'o ben' nao xneza Jesús. La'acazi nacaro ben' zë, nacaro tu cue' ben' nacalë Cristo tuzë. La'acazi netza' dyin quie Diuzi huero quie quiero, naca yuguluro tuzë.

⁶ Netza' ta banegun Diuzi quiero tu turo. Reya'ala' huero dyin dya'a según ta banegun Diuzi quiero tu turo. Chi banegun Diuzi quiero uzioñe'ero benë' con cabë' rna di'idza' la'iya quienë', na'ra lena' reya'ala' huero según cabë' nue Diuzi quie quiero barue quiero xti'idza'në'.

⁷ Chi banegun Diuzi quiero gacalëro benë', na'ra reya'ala' gacalërojë' dyë'ëdi. Chi neziro uzioñe'ero benë' con cabë' rna xti'idza'Diuzi, cana' reya'ala' huero.

⁸ Chi neziro hue'ro benë' di'idza' zëla'adyi', cana' reya'ala' huero. Chi de dumi quiero, reya'ala' gacalëro benë', bihuero cuenda chi yeyuejë' laohue. Chi neziro udze'ro xnezi bi dyin hue ja benë', cana' reya'ala' huero du guicho du la'adyi'ro. Chi neziro yeyëchi'la'adyi'ro ben' yëchi', cana' reya'ala' huero du guicho du la'adyi'ro, bihuerojë' stu'.

Ni rguixogue'n cabë' reya'ala' hue ben' nao xneza Cristo

⁹⁻¹⁰ Bireya'ala' idyë'ëro laguedyiro de ladzazi, pero du guicho du la' adyi'ro reya'ala' idyë'ëro ben' bichiro, ben' nacalëro Cristo tuzë. Puro tadya'a reya'ala' huero, bihuero tamala. Reya'ala' gaparo laguedyiro bala'ana yuguluro.

¹¹ Bireya'ala' huero yela' huëdi, den' dula'adyi'ro reya'ala' huero dyin. Lëscan' dula'adyi'ro reya'ala' huero cabë' mandado re'en Diuzi huero.

¹² Reya'ala' suro contento cuezaro dyë'ëdi dza yezi' Diuzi ra'o. Reya'ala' si'zëro biidza'ro cati raca zëdi quiero. Bireya'ala' usanro ulidzaro Diuzi.

13 Reya'ala' gacalëro laguedyiro ben' nao xneza Cristo, ben' bide quie. Reya'ala' gapachi'ro nu ben' za' zân yu'u quiero.

14 Reya'ala' yëbiro Diuzi huela'iyänë' nu ben' za' rdila rnë len ra'o. Bireya'ala' udze'de'ro benë'.

15 Reya'ala' yedaohuelëro laguedyiro cati raca tadya'a quieyaquë'. Reya'ala' yeyëchi'la'adyi'lëro laguedyiro cati raca tazëdi quieyaquë'.

16 Reya'ala' huero tuzë yuguluro. Bireya'ala' yezë'ro laguedyiro. Bireya'ala' huero yaladyi' ben' yëchi'. Bireya'ala' huero cuinro ben' zë.

17 Bireya'ala' gacalëro lëbi ben' mala. Reya'ala' huero bala tzu'ulëro laguedyiro dyë'ëdi.

18 Por tu parte quiero, huero bi huero tacuenda nita'lëro yugulu benë' dyë'ëdi, ta bibi zëdi gata'.

19 Na'ra bicha', nedyë'ëda' le'e, inia' le'e bireya'ala' yeyuero laohue quie ben' mala. Naoyubi Diuzi bi huenë' quie ben' mala. Cana' rguixogue'n lë'ë guichi la'iya quie Diuzi de que nacan cuenda quie Diuzi huenë' benë' castigo, cala ra'o. Cana' una Diuzi.

20 Lëscan' una Diuzi de que chi rdue ben' rudie ra'o, reya'ala' hue'rojë' ta gaojë'. Chi rbilijë', reya'ala' hue'rojë' ta yo'ojë', porque chi huero cana', huacabë'jë' nacaro ben' huen yedue'jë'. Cana' una Diuzi.

21 Bihue'ro lato hue tamala ra'o gan, reya'ala' huero gan lao tamala, huero puro tahuen.

13

1 Yuguluro reya'ala' uzuro di'idza' cabë' mandado rue nu ben' quie gobierno, porque

Diuzi ulëchinë' ben' quie gobierno. Bizu ben' quie gobierno chan' biulëchi Diuzi lëbë'.

² Nu ben' biruzu di'idza' cabë' mandado rue ben' quie gobierno, na' ruetenë' contra Diuzi, de dula' xquia quienë', hue Diuzi lëbë' castigo.

³ Birdzebi ben' rue tadya'a ben' quie gobierno. Pero sí, rdzebi ben' rue tamala ben' quie gobierno dan' gata' castigo quiejë'. Chi re'enro suro contento, chi re'enro birdzebiro ben' quie gobierno, na'ra reya'ala' taro dula'adyi'ro huero tahuen. Cana' gacabë' ben' quie gobierno nacaro ben' huen.

⁴ Cana' reya'ala' huero como dan' ulëchi Diuzi gobierno ta gaca huen quiero. Chi birdaro dula'adyi'ro bihuero tahuen, reya'ala' yeyuero pensari quiero como dan' naca cuenda quie gobierno huejë' ra'o castigo. Mandado quie Diuzi na' rue gobierno mandado gaca castigo ben' rue tamala.

⁵ Quie lena' reya'ala' uzuro di'idza' cabë' mandado rue nu ben' quie gobierno, no solamente ta bigata' castigo quiero, pero lëscan' como dan' nacan tahuen, nacan ta reya'ala' huero.

⁶ Quie lena' reya'ala' quizũro impuesto como dan' rue ben' quie gobierno mandado quie Diuzi cabë' dyin ruejë'.

⁷ Reya'ala' quizũro chi zu ta reya'ala'quizũro. Reya'ala' quizũro dumi ta rtupa ben' yedyi. Reya'ala' quizũro impuesto quie gobierno. Reya'ala' gapala'nro yugulu ben' rnabë'.

⁸ Chi zu ta reya'ala' quizũro quie benë', reya'ala' useyudyiro quizũron. Pero bireya'ala'

usanro idyë'ëro laguedyiro. Chi nedyë'ëro laguedyiro, con lëzin babzuro di'idza' cabë' mandado rue lao guichi ley quie Diuzi yuguluten.

⁹ Lë'ë guichi ley quie Diuzi rguixogue'n ra'o de que bireya'ala' gasilëro nigula quie ben' tula. Lëscan' quie nigula, bireya'ala' gasilënë' be'mbyu tula. Bireya'ala' gutiro benë', bireya'ala'cuanro quie benë', bireya'ala' si'ro benë' yë', bireya'ala' sa'la'adyi'ro ta de quie benë'. Cana' rnan lë'ë guichi ley quie Diuzi. Pero lëscan' rguixogue'n ra'o de que reya'ala' idyë'ëro benë' cabë' nadyë'ëro cuinro. Chi huero cana', banaca quiero babzuro yugulu di' idza' cabë' mandado rue Diuzi lë'ë guichi ley quienë'.

¹⁰ Chi nadyë'ëro benë', bihuerojë' mala. Cana' huero uzuro di'idza' dyë'ëdi ca mandado rue Diuzi lë'ë guichi ley quienë'.

¹¹ Como cana' nacan, reya'ala' huero pensari ca tu dza rdaro lao yedyi layu. Reya'ala' huebë'ro abdyin hora yeyu'uro pensari dyë'ëdi, como dan' barueran bago dza yezi' Diuzi ra'o, cala ca dza na'te, dza uzulaoro inaoro xneza Cristo.

¹² Ilë'ëti'zi rdziogue iyudyi dza rdaro lao yedyi layu idyin dza yezi' Diuzi ra'o. Quie lena' bireya'ala' huero tamala ca ben' rda lao lato lao chula. Reya'ala' biidzebiro suro listo sëraro ca zë soldado, ben' napa fuerza, ben' rda te dza.

¹³ Reya'ala' taro dyë'ëdi ca ben' rda te dza. Bireya'ala' taro huero hue'e. Bireya'ala' taro ga ruejë' lani, ga ruejë' ru'be, ga ruejë' huedila. Bireya'ala' talëro nigula con ganzi. Bireya'ala' taro quiloros zëdi quiloros dila.

¹⁴ Reya'ala' taro yenaoro tuzë Jesucristo dyë'edi. Bitaro huero ta rnazin quiero.

14

Bireya'ala' inëbižoro laguegyiro ben' nao xneza Jesús

¹ Reya'ala' hue'lële ben' zaozulao inao xneza Jesús di'idza' zëla'adyi'. Bitzu'ule huedila huenë tu ta binaca.

² Por ejemplo, bala ben' nao xneza Jesús rnajë' ru'en lato gaoro biti'tezi ta de. Na' ibala ben' nao xneza Jesús, ben' zaozulao inao xnezanë', rnajë' bireya'ala' gaoro bë'ëla'. Quie lena' puro yëza cuan gaojë'.

³ Na' yaca ben' rao biti'tezi ta de, bireya'ala' ilë'ëyaquë' mala ben' rao puro yëza cuan. Bireya'ala' inëbižoyaquë' laguegyijë' como dan' rupa cue'jë' nacajë' ben' nao xneza Jesús.

⁴ ¿Nuži bë le'e mandado inëbižole laguegyile, ben' naorë xneza Diuzi? Nacan cuenda quie xa'një' chi ruejë' tahuen, chi ruejë' tamala, cala cuenda quiele. Pero huacacazi huen quiejë', como dan' de yela' huaca quie Diuzi ta uca'nnë' lëjë' huen.

⁵ Re'enda' inia' le'e itu ejemplo: Yu'u bala ben' nao xneza Jesús rnayaquë' tuzi dza naca la'iya tzion'la'adyi'ro Diuzi, cala biti'tezi dza nacan dza huen. Na' yu'u ibala ben' nao xneza Jesús rnajë' biti'tezi dza nacan dza huen tzion'la'adyi'ro Diuzi. Quie quiele reya'ala' huele pensari inezile dyë'edi ta huele cabë' reya'ala' huele.

⁶ Na'ra quie ben' rna tuzi dza naca la'iya tzionla'adyi'ro Diuzi, cala yugu dza nacan huen, ruejè' cana' ta gapala'njè' Cristo. Lëscan' yaca ben' rna biti'tezi dza nacan dza huen tzionla'adyi'ro Diuzi, ruejè' cana' ta gapala'nrejè' Cristo. Na'ra quie ben' rna ru'en lato gaoro biti'tezi ta de, na' ruejè' cana' ta gapala'njè' Cristo. Lëscan' ben' rao puro yëza cuen, na' ruejè' cana' ta gapala'nrejè' Cristo, na' yëbijè' Diuzi diuxcalelo'.

⁷ Ni tu ra'o binita'ro tuzi cabè' nita'ro lao yedyi layu. Ni tu ra'o bigatiro tuzi cabè' gatiro lao yedyi layu. Zu Cristo rna' ruhuanè' ra'o.

⁸ Chi zuro nabanro lao yedyi layu, na' zuro nabanro ta gapala'nro Cristo. Lëscan' chi gatiro yeyoro guibá, na' gatiro yeyoro guibá ta gapala'nro Cristo. La'acazi nabanro, la'acazi gatiro, pero nacaro ben' quie Cristo.

⁹ Cana' nacan como aguti Cristo bebannè' naquè' xuzi xa'n yugulu benè', la'acazi ben' neban, la'acazi ben' huati.

¹⁰ Pero le'e, ¿bixquien' rnëbižole ben' bichile ben' nao xneza Jesús? ¿Bixquien' rezè'le laguedyile? Pues yuguluro naca quiero yedyinro lao Cristo huero cuenda cabè' bëro, chi bëro tahuen, chi bëro tamala.

¹¹ Lena' rguixogue'n lë'ë guichi la'iya quie Diuzi cabè' unanè' cani:

Como nacan tali nabana', lëscan' nacan tali idyin dza quitzu zībi yugulu benè' laohua', hueyaquè' nē'ēdi' ben' zē.

Cana' una Diuzi dza na'te.

12 Cana' nacan huadyin dza quie quiero huero cuenda lao Diuzi cabë' bëro dza udaro lao yedyi layu.

Reya'ala' inaoro neza dya'a

13 Quie lena' bireya'ala' inëbižoro laguedyiro. Mejorla huero pensari inaoro neza dya'a cuenda biiquixi laguedyiro huejë' tamala por dula' quiero.

14 Na'ra quie bë'ëla', cala cuinnan nacan zūdyi nu gao len. Lena' banezda' dyë'ëdi como naca' ben' nao xneza xa'nro Jesús. Pero chi rue bala benë'pensari naca zūdyi gaojë' bë'ëla', na'ra para lëjë' sí, binacan huen gaojë'n, como dan' raquejë' zūdyi nacan gaojë'n.

15 Chi por nun quie dan' re'enro gaoro bi cosa utëbiro pensari quie yaca bi' bichiro, ben' nao xneza Jesús, na'ra lena' rulu'en rdziogue idyë'ëro yaca ben' bichiro. Bihuero ta yega'n yaca ben' bichiro mala lao Diuzi por nun quie dan' re'enro gaoro bi cosa.

16 Biutëbiro pensari quie bichi laguedyiro, ben' nao xneza Jesús. Bihuero bi cosa re'enro huero, la'acazi naparo derecho hueron, la'acazi neziro cala tamala chi hueron.

17 Binacan belao bi ta gaoro, bi ta yo'oro. Pero tabelao na' inaro tuzi pensari dya'a. Tabelao na' cue' chizi laxta'oro, suro contento tanun quie dan' yu'u lu'u guicho laxta'oro pensari quie Bichi Be quie Diuzi.

18 Redaohue Diuzi nu ben' rue cana', ben' nao xneza Cristo dyë'ëdi. Lëscan' hualë'ë yaca benë' lëbë' ben' huen.

19 Cana' huero seguir inaoro huero tadya'a cuenda na' cue' chizi laxta'oro, gacalëro laguedyiro ta tzioñe'ejë' mazara con cabë' rna xti'idza' Diuzi.

20 Binaca huen te cana'zi dyin quie Diuzi por nun quie bi ta re'enro gaoro. Banezcaziro baben Diuzi lato gaoro yugulu ta de ta gaoro. Pero tamala na' gaoro bi cosa chi por lena' utëbiro pensari quie laguedyiro yela' na' huejë' ta bireya'ala' huejë'.

21 Mejorla biyo'oro bigaoro bi cosa, bihuero bi cosa chi por lena' utëbiro pensari quie ben' bichiro, ben' naorë xneza Jesús, yela' na' huenë' tu ta bireya'ala' huenë'.

22 Reya'ala' gaparo cuidado cabë' ruero cuinro lao Diuzi. Bihuero cuinro ben' zë nun que nacaro ben' quie Diuzi. Tahuen na' naca quiero chi bigao pensari quiero ra'o xquia cabë' ta ruero.

23 Chi ineziro nacan xquia tu ta inan quiero huero, na' bireya'ala' huero. Nacan xquia quiero chi huero. Lëscan' reya'ala' ineziro dyë'ëdi chi nacan huen, na' huero. Chi neziro dyë'ëdi binacan huen, mejorla bihuero como dan' nacan xquia quiero chi huero.

15

Huero tahuen quie laguedyiro cala para ra'ozi

1 Ra'o, ben' bazio tiempo nao xneza Cristo, reya'ala' gacalëro laguedyiro, ben' zaozulao inao xneza Cristo. Naca cuenda quiero gacalërojë' huero tahuen quiejë', cala para ra'ozi.

² Yuguluro reya'ala' huero tahuen quie laguedyiro, reya'ala' gacalërojë' tzioñe'eyaquë' mazara, na' huebë'jë' Diuzi hue quiejë' xti'idza'në'.

³ Cana' reya'ala' huero como dan' Cristo bibënë' huen para cuinzinë', pero lëscan' bënë' huen para yugulu benë'. Guca quienë' cabë' rguixogue'n lë'ë guichi la'iya quie Diuzi de que nu ben' rutasi runio Diuzi, lëscan' rutasi runiorënë' Cristo. Cana' rnën lë'ë guichi.

⁴ Na' rnia' le'e, yugulu ca di'idza' bzuyaquë' lë'ë guichi la'iya quie Diuzi dza na'te, nacan ta gacalën ra'o ta tzioñe'ero mazara Diuzi. Lëscan' nacan ta uxela'adyi'n ra'o ta cuezaro dyë'ëdi dza yezi' Diuzi ra'o biyeyatiro.

⁵ Rulidza' Diuzi gacalënë' le'e tzu'ulële laguedyile dyë'ëdi ca reya'ala'huele le'e, ben' nao xneza Cristo. Naca Diuzi ben' racalë ra'o cuezaro dyë'ëdi. Naca Diuzi ben' ru'elë ra'o di'idza' zëla'adyi'.

⁶ Cana' naca quiero cuenda yuguluro huero tuzë gaparo Diuzi bala'ana. Naca Diuzi xuzi xan' Señor quiero Jesucristo.

Lëscan' bida Cristo lao yedyi layu cuenda inao yaca ben' binaca ben' Israel xnezanë', na' gapajë' Diuzi bala'ana

⁷ Reya'ala' huelëro laguedyiro tuzë cabë' bëlë Cristo ra'o tuzë. Cana' gapala'nro Diuzi bala'ana.

⁸ Pero rnia' le'e, bida Cristo lao yedyi layu ta gacalënë' ben' Israel, na' uzunë' di'idza' cabë' di'idza' bega'n'lë Diuzi xuzixta'ohua' dza na'te. Bidë' ta ilë'ë ben' Israel naca Diuzi ben' ruzu di'idza'.

9 Lëscan' bida Cristo lao yedyi layu cuenda inao yaca ben' binaca ben' Israel xnezè', na' gapajè' Diuzi bala'ana tanun quie dan' beyèchi'la'adyi' Diuzi leyaquè'. Lena' rguixogue'n lè'è guichi la'iya quie Diuzi cani:

Quie lena' gapa yaca ben' za' yedyi tula Diuzi bala'ana.

Quie lena' gulayaquè' himno ta gapala'njè' lèbè'.

10 Lèzi zu itu cue' lè'è guichi la'iya ga rguixogue'nani cani:

Reya'ala' yedaohuele le'e, ben' za' yedyi tula, len le'e, ben' Israel, ben' quie Diuzi.

11 Lèzi zu itu cue' lè'è guichi la'iya ga rguixogue'nani cani:

Ulegapa Diuzi bala'ana yugulu le'e, ben' za' yedyi tula.

Ulequixogue' yaca benè' ca ben' zè naca Diuzi yugulu le'e, ben' binaca ben' Israel.

12 Lëscan' Isaías, ben' uzu dza na'te, bzunè' di'idza' lè'è guichi de que:

Hualo tu z'i suba Isaí.

Lèbè' gaquè' rey inabè'nè' lao yaca ben' binaca ben' Israel.

Sudyi'ilèyaquè' lèbè' ta uca'nnè'yaquè' huen lao Diuzi.

Cana' rnan lè'è guichi na'.

13 Na'ra nè'èdi' rulidza' Diuzi, ben' nuxela'adyi' ra'o, ta tzu'ule gusto cue' chizi laxta'ole como dan' barue quiele xti'idza'nè'. Lëscan' rulidza'nè' ta gaca zèla'adyi' dyè'èdi guicho laxta'ole tanun quie dan' baoyu'ule pensari quie Diuzi.

14 Na'ra bicha', banezda' dyè'èdi nacale ben' huen, ben' rioñe'e. Nezile uzioñe'ele usèdile laguedyile, ben' nao xneza Cristo.

15 Cabë' di'idza' bzua' lë'ë guichi ni, biberugueda' inia' le'e cabë' reya'ala' tzioñe'ele cuenda bigalala'adyi'le cabë' unia' le'e. Cana' bia' por nun quie mandado pca'n Diuzi lao na'a, use'elë' në'ëdi'

16 tzaya' dyin quie Cristo entre yaca ben' binaca ben' Israel. Nacan mandado hua' tzetixogui'ajë' xti'idza' Diuzi cuenda hue quieyaquë' xti'idzë', yela' na' gata' yela' neban quiejë' tuzioli, na' yedyinyaquë' dyë'ëdi lao Diuzi. Cana' yezi' Diuzi lëjë', na' nacajë' ben' la'iya, ben' yu'u pensari quienë' lu'u guicho laxta'ohue.

17 Como naca' ben' quie Cristo Jesús, redaohueda' bia' ca mandado bë Diuzi në'ëdi'.

18 Re'enda' inia' le'e cabë' bëla'iya Cristo në'ëdi' bia' cabë' mandado bënë' në'ëdi'. Lëzin inia' le'e cala bila di'idza' inia' le'e. Gucalë Cristo në'ëdi' udixogui'a ben' binaca ben' Israel xti'idza' Diuzi, na'tera barue quieyaquë' xti'idza'në'.

19 Cana' bia' udixogui'ajë' xti'idza' Diuzi, bia' yela' huaca quienë', gucalë Bichi Be quienë' në'ëdi'. Cana' bia' apseyudya' bia' mandado udixogui'a benë' xti'idza' Diuzi. Cana' bia' udixogui'a yaca ben' ciudad Jerusalén xti'idza' Diuzi. Lagazi cana' babia', baoya'a hasta ga rzulao yu nebaba Ilírico.

20 Cana' bia', bia' bala, uya'a yedyi ga binenezijë' chi zu Cristo udixogui'ajë' xti'idza' Diuzi. Cana' bia' cuenda tza'a yedyi tula ga nunu netzio tzetixogue' xti'idza' Diuzi.

21 Pero mejorla hua' seguir con cabë' rnan lë'ë guichi la'iya quie Diuzi cani:

Huanezi yaca ben' binenezi quienë'.

Huayoñe'e yaca ben' binetzioñe'e quienë'.

Bë Pablo pensari tzioguë' ciudad Roma

²² Quie lena' biuzãaque'da' guida' idena'a le'e como dan' bibënan lato la'acazi gu'unda' guida'.

²³ Pero como abeyudyi compromiso napa' conlë yaca yedyi ga baodia', lëscan' como bazio zë iza raca' pensari guida' ideyuba' le'e,

²⁴ quie lena', caora tza'a nación España, cana' re'enda' tia' ciudad quiele. Na' rapa' gusto yega'na' sulia' le'e ga'aca tu ta gunnan lato. Yeyudyi na', chi huele cule, gacalële në'ëdi' tzu'a neza tatula tza'a España.

²⁵ Pero na'a raoyen yeya'a ciudad Jerusalén tzehua'a lë'ëti' dumi ta gacalën yaca ben' bichiro, ben' nao xneza Jesús nita' na'.

²⁶ Cana' re'ennan hua', como dan' yaca ben' nao xneza Jesús nita' yu nebaba Macedonia, len yaca ben' nao xneza Jesús nita' yedyi Acaya, baptupajë' dumi ta ise'ela'yaquë'n quie ben' yëchi', ben' nao xneza Jesús nita' ciudad Jerusalén.

²⁷ Redaohue ben' ptupa dumi como neziyaquë' nacan tahuen gacalëjë' laguedyijë', ben' nao xneza Jesús. Na'ra yu'un xnezi ta ruejë', porque rueyaquë' ta reya'ala' hueyaquë' quie ben' nita' ciudad Jerusalén. Cana' nacan, como dan' lao na'a ben' nita' ciudad Jerusalén barue quieyaquë' xti'idza' Diuzi barnaoyaquë' xneza Cristo. Na'ra lëjë' sí, reya'ala' gacalëjë' ben' nita' ciudad Jerusalén con ta de quieyaquë'.

²⁸ Caora abeyudyi yehua'a dumi lao yaca ben' nao xneza Cristo nita' ciudad Jerusalén, na'ra tza'a España tia' ideyuba' le'e.

²⁹ Nacan tali tuzē huela'iya Cristo ra'o caora idyina' yedyi quiele.

³⁰ Bicha', re'enda' gacalēle nē'ēdi'. Re' enda' huero tuzē huero ca re'en Diuzi huero du guicho du la'adyi'ro. Chi huele cule, ulidzale Diuzi por nē'ēdi'. Laohue xa'nro Jesucristo rnaba' le'e ulidzale Diuzi por nē'ēdi'. Lēscan' como dan' nadyē'ēle nē'ēdi' cabē' bzioñe'e Bichi Be quie Diuzi le'e, rnaba' le'e ulidzale Diuzi por nē'ēdi'.

³¹ Ulidzale Diuzi ta ucuasa ucu'onē' nē'ēdi' quie tamala re'en hue yaca ben' nita' estado Judea quia', ben' binao xneza Cristo. Lēscan' ulidzale Diuzi para yaca ben' nita' ciudad Jerusalén, ben' nao xneza Cristo, ta si'yaquē' nē'ēdi' dyē'ēdi' gacalia'yaquē'.

³² Cana' rnaba' le'e ulidzale Diuzi por nē'ēdi' cuenda idyina' dyē'ēdi' idena'a le'e sua' contento yezila'adya' tu chi'.

³³ Rulidza' Diuzi, ben' cuēchi chizi laxta'oro, ta ina' ihuianē' yugulule. Amén.

16

Rugapa Pablo diuzi yaca ben' nao xneza Jesús

¹ Redaohueda' idyin ben' zanro Febe yedyi quiele. Tazē racalēnē' ben' nao xneza Cristo nita' yedyi Cencrea.

² Si'le lēbē' dyē'ēdi' ca rue ben' nao xneza Cristo. Gacalēlenē' tu ta rdzioguenē', porque ben' zē bagucalēnē'. Lēscan' bagucalēnē' nē'ēdi'.

³ Ugapale diuzĩ Priscila len Aquilo. Nacayaquë' ben' compañero quia'. Aracalëyaquë' në'ëdi' ruendo' dyin quie Cristo Jesús.

⁴ Bibdzebiyaquë' gatiyaquë' gucalëjë' në'ëdi' caora aruen zũdyi guti yaca benë' në'ëdi'. Quie lena' inia' diuxcaleyaquë' gucalëjë' në'ëdi'. Pero cala tuza' në'ëdi' inia' diuxcaleyaquë', lëscan' yugulu ben' nao xneza Cristo, ben' binaca ben' Israel, inajë' diuxcaleyaquë'.

⁵ Ugapale diuzĩ yaca ben' bichiro, ben' regu'udi' zãn yu'u quie Priscila len Aquilo. Lëscan' ugapale diuzĩ Epeneto, ben' naca amigo quia'. Lëbë' naquë' ben' nëro, ben' unao xneza Cristo entre yaca ben' nita' yu nebaba Acaya.

⁶ Ugapale diuzĩ María, ben' ruelële dyin quie Diuzi tuzë.

⁷ Ugapale diuzë ben' yedyi quia' Andrónico, len Junias, ben' uya'lia' dyiguiba tuzë. Anezi yaca apóstol nacayaquë' ben' huen gula. Tu binenaohua' xneza Cristo, barnaoyaquë' xneza Cristo.

⁸ Ugapale diuzĩ Amplias, ben' naca amigo quia', ben' naorë xneza Cristo.

⁹ Ugapale diuzĩ Urbano, ben' naca compañero quiendo'. Aracalënë' nëto' ruendo' dyin quie Cristo Jesús. Lëscan' ugapale diuzĩ Estaquis, ben' naca amigo quia'.

¹⁰ Ugapale diuzĩ Apeles, ben' nao du guicho du la'adyi' xneza Cristo. Lëscan' ugapale diuzĩ yaca ben' naca familia quie Aristóbulo.

¹¹ Ugapale diuzĩ Herodión, ben' naca ben' yedyi quia'. Lëscan' ugapale diuzĩ yaca ben' naca familia quie Narciso, con nuyaquë' naoyaquë'

xneza Cristo.

¹² Ugapale diuzĩ Trifena len Trifosa. Nacajë' ben' rue dyin quie Cristo. Lëscan' ugapale diuzĩ Pérsida, ben' naca ben' zanro tanun quie barnaorënë' xneza Cristo. Tazë bazioguë' naohuë' ruenë' dyin quie Cristo.

¹³ Ugapale diuzĩ Rufo, ben' rue quie xti'idza' Cristo dyë'ëdi. Lëscan' ugapale diuzĩ zña'në' como rlë'ënë' në'ëdi' ca zĩ'inë'.

¹⁴ Ugapale diuzĩ Asíncrito, len Flegonte, len Hermes, len Patrobas, len Hermas, len yaca los demás ben' bichiro, ben' nao xneza Jesús, ben' regu'udi' len leyaquë' na'.

¹⁵ Lëscan' ugapale diuzĩ Filólogo len Julia. Ugapale diuzĩ Nereo len bi' zannë'. Lëscan' ugapale diuzĩ Olimpas len yaca los demás ben' bichiro, ben' nao xneza Cristo, ben' regu'udi' len leyaquë' na'.

¹⁶ Quëdyile laguedyile dyë'ëdi. Gaole xagajë' tu psitu, na' yëbileyaquë' padiux. Yaca los demás ben' nao xneza Jesús, ben' nita' yedyi tula, rugapajë' le'e diuzĩ.

¹⁷ Na'ra inia' le'e itu di'idza', bicha'. Gapale cuidado ina'le dyë'ëdi nu ben' hue le'e chopa tzona cue', ben' udze' le'e neza tula ta binaca quie Diuzi. Bihuelële leyaquë' tuzë,

¹⁸ como dan' cala mandado quie xa'nro Jesucristo ruejë', dechan' ta racazi la'adyi'jë' ruejë' cana'. Rdalëyaquë' di'idza' huizi' yë' quieyaquë' huejë' gan ben' binenezi cabë' nacayaquë'.

¹⁹ Anezi yaca benë' cabë' naca le'e, barnaole xneza Cristo. Quie lena' zua' gusto, re'enda'

huele seguir huele puro tadya'a, bihuele ni tu tamala.

²⁰ Ilë'ëti'zi idyin dza quizõ Diuzi tu castigo huala gula quie xan' taxi'ibi' Satanás. Bira huelënan le'e. Naca Diuzi ben' cuëchi chizi guicho laxta'oro. Rulidza' xa'nro Jesucristo huela'iyané' le'e.

²¹ Na' Timoteo, ben' ruelë në'ëdi' dyin quie Diuzi tuzë, rugapanë' le'e diuzĩ. Lëscan' rugapa ben' yedyi quia' Lucio, lënë' Jasón, lënë' Sosipater le'e diuzĩ.

²² Lëscan' në'ëdi', Tercio, ben' bzu di'idza' lë'ë guichi niga, rugapa' le'e diuzĩ laohue Cristo.

²³ Lëscan' Gayo, ben' zua' zãn yu'u quie, ben' run posada yuguluro ben' nao xneza Cristo, len Erasto, ben' naca tesorero quie yedyi ni, rugapanë' le'e diuzĩ. Lëscan' rugapa ben' bichiro Cuarto le'e diuzĩ.

²⁴ Rulidza' xa'nro Jesucristo huela'iyané' yugulule. Amén.

Ga iyudyi carta ni rapa Pablo bala'ana Diuzi

²⁵ Lëscan' rulidza' Diuzi ta gacalënë' le'e ta biidzebile inaole xneza Cristo gata' quiele yela' neban tuzioli con cabë' rna xti'idza' Diuzi. Cana' baodixogui'a le'e de acuerdo con cabë' una cuin Cristo. Cana' bë Diuzi pensari huenë' dza na'te, dza binesi' laze cue' yedyi layu. Pero baquezi biuna Diuzi ca huenë' quiele.

²⁶ Ulezë' hasta hora, na'tera barnezan quie pensari bë Diuzi dza na'te. Barnezan por nun quie di'idza' la'iya bzu ben' unita' dza na' lë'ë guichi, ben' udixogue' xti'idza' Diuzi. Na'ra babë' Diuzi mandado inezi yugulu ben' nita' lao yedyi

layu con cabë' rna di'idza' la'iya quienë' cuenda
na' hue quieyaquë' di'idza' quienë'. Tuzioli zu
Diuzi.

²⁷ Tuzi Diuzi zu. Tuzi lëbë' naquë' ben' rioñe'e.
Tuzioli reya'ala' gaparo Diuzi bala'ana laohue
zî'inë' Jesucristo. Amén.

Xti'idza' Diuzi
New Testament in Zapotec, Choapan
(MX:zpc:Zapotec, Choapan)

copyright © 1986 Wycliffe Bible Translators, Inc.

Language: Zapotec, Choapan

Translation by: Wycliffe Bible Translators, Inc.

Zapoteco, Choapan [zpc], Mexico

Copyright Information

© 1986, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Choapan

© 1986, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Mar 2026 from source
files dated 29 Jan 2022
f44721e8-d767-55bd-8bcb-f1eb4965c7c2